

PRAEFATIO PANEGYRICI DICTI ANTHEMIO AUGUSTO BIS CONSULI

S1 v.1 Cum juvenem super astra Jovem natura locaret
 2 susciperetque novus regna vetusta deus,
 3 certavere suum venerari numina numen
 4 disparibusque modis par cecinere sophos.
 5 Mars clangente tuba patris praeconia dixit
 6 laudavitque sono fulmina fulmineo ;
 7 Arcas et Arcitenus fidibus strepuere sonoris,
 8 doctior hic citharae pulsibus, ille lyrae ;
 9 Castalidumque chorus vario modulamine plausit,
 10 carminibus, cannis, pollice, voce, pede.
 11 Sed post caelicolas etiam mediocria fertur
 12 cantica semideum sustinuisse deus.
 13 Tunc Faunis Dryades Satyrisque Mimallones aptae
 14 fuderunt lepidum, rustica turba, melos.
 15 Alta cicuticines liquerunt Maenala Panes
 16 postque chelyn placuit fistula rauca Jovi.
 17 Hos inter Chiron, ad plectra sonantia saltans,
 18 flexit inepta sui membra facetus equi ;
 19 semivir audiri meruit meruitque placere,
 20 quamvis hinnitum, dum canit, ille daret.
 21 Ergo sacrum dives et pauper lingua litabat
 22 summaque tunc voti victima cantus erat.
 23 Sic nos, o Caesar, nostri spes maxima saeculi,
 24 post magnos proceres parvula tura damus,
 25 audacter docto coram Victore canentes,
 26 aut Phoebi aut vestro qui solet ore loqui ;
 27 qui licet aeterna sit vobis questor in aula,
 28 aeternum nobis ille magister erit.
 29 Ergo colat variae te, princeps, hostia linguae ;
 30 nam nova templa tibi pectora nostra facis.

PANEGYRICUS

S2 v.1 Auspicio et numero fasces, Auguste, secundos
 2 erige et effulgens trabealis mole metalli
 3 annum pande novum consul vetus ac sine fastu
 4 scribere bis fastis. Quamquam diademate crinem
 5 fastigatus eas umerosque ex more priorum
 6 includat Sarrana chlamys, te picta togarum
 7 purpura plus capiat, quia res est semper ab aevo
 8 rara frequens consul. Tuque o cui laurea, Jane,
 9 annua debetur, religa torpore soluto
 10 quavis fronde comas, subita nec luce pavescas
 11 principis aut rerum credas elementa moveri.
 12 Nil natura novat : sol hic quoque venit ab ortu.
 13 Hic est, o proceres, petiit quem Romula virtus
 14 et quem vester amor ; cui se ceu victa procellis

15 atque carens rectore ratis respublica fractam
 16 intulit, ut digno melius flectenda magistro,
 17 ne tempestates, ne te, pirata, timeret.
 18 Te prece ruricola expetiit, te foedere junctus
 19 adsensu, te castra tubis, te curia plausu,
 20 te punctis scripsere tribus collegaque misit
 21 te nobis regnumque tibi ; suffragia tot sunt
 22 quanta legit mundus. Fateor, trepidavimus omnes,
 23 ne vellet collega pius permittere voto
 24 publica vota tuo. Credet ventura propago ?
 25 In nos ut possint, Princeps, sic cuncta licere,
 26 de te non totum licuit tibi. Facta priorum
 27 exsuperas, Auguste Leo ; nam regna superstat
 28 qui regnare jubet : melius respublica vestra
 29 nunc erit una magis, quae sic est facta duorum.
 30 Salve, sceptrorum columen, regina Orientis,
 31 orbis Roma tui, rerum mihi principe misso
 32 jam non Eoo solum veneranda Quiriti,
 33 imperii sedes, sed plus pretiosa quod exstas
 34 imperii genetrix. Rhodopen quae portat et Haemum,
 35 Thracum terra tua est, heroum fertilis ora.
 36 Excipit hic natos glacies et matris ab alvo
 37 artus infantum molles nix civica durat.
 38 Pectore vix alitur quisquam, sed ab ubere tractus
 39 plus potat per vulnus equum ; sic lacte relicto
 40 virtutem gens tota bibit. Crevere parumper :
 41 mox pugnam ludunt jaculis ; hos suggerit illis
 42 nutrix plaga jocos. Pueri venatibus apti
 43 lustra feris vacuant ; raptio ditata juvenus
 44 jura colit gladii, consummatamque senectam
 45 non ferro finire pudet : tali ordine vitae
 46 cives Martis agunt. At tu circumflua ponto
 47 Europae atque Asiae commissam carpis utrimque
 48 temperiem ; nam Bistonios Aquilonis hiatus
 49 proxima Calchidici sensim tuba temperat Euri.
 50 Interea te Susa tremunt ac supplice cultu
 51 flectit Achaemenius lunatum Persa tiaram.
 52 Indus odorifero crinem madefactus amomo
 53 in tua lucra feris exarmat guttur alumnis,
 54 ut pandum dependat ebur ; sic trunca reportat
 55 Bosphoreis elephas inglorius ora tributis.
 56 Porrigis ingentem spatiosis moenibus urbem,
 57 quam tamen angustam populus facit ; itur in aequor
 58 molibus et veteres tellus nova contrahit undas ;
 59 namque Dicarcheae translatus pulvis harenae
 60 intratis solidatur aquis durataque massa
 61 sustinet advectos peregrino in gurgite campos.
 62 Sic te dispositam spectantemque undique portus,
 63 vallatam pelago terrarum commoda cingunt.
 64 Fortunata sat es Romae partita triumphos
 65 et jam non querimur ; valeat divisio regni.
 66 Concordant lancis partes ; dum pondera nostra
 67 suscipis, aequasti. Tali tu civis ab urbe
 68 Procopio genitore micas, cui prisca propago
 69 Augustis venit a proavis ; quem dicere digno
 70 non datur eloquio, nec si modo surgat Averno
 71 qui cantu flexit scopulos digitisque canoris
 72 compulit auritas ad plectrum currere silvas,

73 cum starent Hebri latices cursuque ligato
74 fluminis attoniti carmen magis unda sitiret.
75 Huic quondam juveni reparatio credita pacis
76 Assyriae ; stupuit primis se Parthus in annis
77 consilium non ferre senis ; conterritus haesit
78 quisque sedet sub rege statraps ; ita vinxerat omnes
79 legatis genius. Tremuerunt Medica rura,
80 quaeque draconigenae portas non clauserat hosti,
81 tum demum Babylon nimis est sibi visa patere.
82 Partibus at postquam statuit nova formula foedus
83 Procopio dictante magis, juratur ab illis
84 ignis et unda deus, nec non rata pacta futura
85 hic divos testatur avos. Chaldaeus in extis
86 pontificum de more senex arcana peregit
87 murmura ; gemmantem pateram rex ipse retentans
88 fudit turicremis carchesia cernuus aris.
89 Suscipit hinc reducem duplicati culmen honoris :
90 patricius nec non peditumque equitumque magister
91 praeficitur castris, ubi Tauri claustra coeruens
92 Aethiopasque vagos belli terrore relegans
93 gurgite pacato famulum spectaret Orontem.
94 Huic socer Anthemius, praefectus, consul et idem,
95 iudiciis populos atque annum nomine rexit.
96 Purpureos Fortuna viros cum murice semper
97 prosequitur ; solum hoc tantum mutatur in illis,
98 ut regnet qui consul erat. Sed omittimus omnes.
99 Jam tu ad plectra veni, tritus cui casside crinis
100 ad diadema venit, rutilum cui Caesaris ostrum
101 deposito thorace datur sceptroque replenda
102 mucrone est vacuata manus. Cunabula vestra
103 imperii fulsere notis et praescia tellus
104 aurea converso promisit saecula fetu.
105 Te nascente ferunt exorto flumina melle
106 dulcatis cunctata vadis oleique liquores
107 isse per attonitas baca pendente trapetas.
108 Protulit undantem segetem sine semine campus
109 et sine se natis invidit pampinus uvis.
110 Hibernae rubuere rosae spretoque rigore
111 lilia permixtis insultavere pruinis.
112 Tale puerperium quotiens Lucina resolvit,
113 mos elementorum cedit regnique futuri
114 fit rerum novitate fides. Venisse beatos
115 sic loquitur natura deos : constantis Iuli
116 lambebant teneros incendia blanda capillos ;
117 Astyages Cyro pellendus forte nepoti
118 inguinis expavit diffusum vite racemum ;
119 praebuit intrepido mammas lupa feta Quirino ;
120 Julius in lucem venit dum laurea flagrat ;
121 magnus Alexander nec non Augustus habentur
122 concepti serpente deo Phoebumque Jovemque
123 divisere sibi ; namque horum quaesiit unus
124 Cinyphia sub Syrte patrem ; maculis geneticis
125 alter Phoebigenam sese gaudebat haberi,
126 Paeonii jactans Epidauria signa draconis.
127 Multos cinxerunt aquilae subitumque per orbem
128 lusit venturas famulatrix penna coronas.
129 Ast hunc, egregii proceres, ad sceptrum vocari
130 jam tum nosse datum est, laribus cum forte paternis

131 protulit excisus jam non sua germina palmes.
132 Imperii ver illud erat ; sub imagine frondis
133 dextra per arentem florebant omina virgam.
134 At postquam primos infans exegerat annos,
135 reptabat super arma patris, quamque arta terebat
136 lammina cervicem gemina complexus ab ulna
137 livida laxatis intrabat ad oscula cristis.
138 Ludus erat puero raptas ex hoste sagittas
139 festina tractare manu captosque per arcus
140 flexa reluctantes in cornua trudere nervos,
141 nunc tremulum tenero jaculum torquere lacerto
142 inque frementis equi dorsum cum pondere conti
143 indutas Chalybum saltu transferre catenas,
144 inventas agitare feras et fronde latentes
145 quaerere, deprensas modo claudere cassibus artis,
146 nunc torto penetrare veru ; tum saepe fragore
147 laudari comitum, frendens cum belua ferrum
148 ferret et intratos exirent arma per armos.
149 Conde Pelethronios, alacer puer et venator,
150 Aeacida, titulos, quamquam subjecta magistri
151 terga premens et ob hoc securus lustra pererrans
152 tu potius regereris equo. Non principe nostro
153 spicula direxit melius Pythona superstans
154 Paeon, cum vacua turbatus paene pharetra
155 figeret innumeris numerosa volumine telis.
156 Nec minus haec inter veteres audire sophistas :
157 Mileto quod crete Thales vadimonia culpas,
158 Lindie quod Cleobule canis : "modus optimus esto",
159 ex Ephyra totum meditaris quod Periander,
160 Attice quodve Solon finem bene respicis aevi,
161 Prienaee Bia, quod plus tibi turba malorum est,
162 noscere quod tempus, Lesbo sate Pittace, suades,
163 quod se nosse omnes vis, ex Lacedaemone Chilon.
164 Praeterea didicit varias, nova dogmata, sectas :
165 quidquid laudavit Scythicis Anacharsis in arvis,
166 quidquid legisfero profecit Sparta Lycurgo,
167 quidquid Erechtheis Cynicorum turba volutat
168 gymnasiis, imitata tuos, Epicure, sodales,
169 quidquid nil verum statuens Academia duplex
170 personat, arroso quidquid sapit ungue Cleanthes,
171 quidquid Pythagoras, Democritus, Heraclitusque
172 deflevit, risit, tacuit ; quodcumque Platonis
173 ingenium, quod in arce fuit, docet ordine terno,
174 quae vel Aristoteles, partitus membra loquendi,
175 argumentosis dat retia syllogismis ;
176 quidquid Anaximenes, Euclides, Archyta, Zenon,
177 Arcesilaus, Chrysippus Anaxagorasque dederunt,
178 Socraticusque animus post fatum in Phaedone vivus,
179 despiciens vastas tenuato in crure catenas,
180 cum tremere mors ipsa reum ferretque venenum
181 pallida securo lictoris dextra magistro.
182 Praeterea quidquid Latialibus indere libris
183 prisca aetas studuit, totum percurrere suetus :
184 Mantua quas acies pelagique pericula lusit,
185 Zmyrnaeas imitata tubas, quaecumque loquendi
186 Arpinas dat consul opem, sine fine secutus
187 fabro progenitum, spreto cui patre polita
188 eloquiis plus lingua fuit, vel quidquid in aevum

189 mittunt Euganeis Patavina volumina chartis ;
190 qua Crispus brevitatem placet, quo pondere Varro,
191 quo genio Plautus, quo fulmine Quintilianus,
192 qua pompa Tacitus numquam sine laude loquendus.
193 His hunc formatum studiis, natalibus ortum,
194 moribus imbutum princeps, cui mundus ab Euro
195 ad Zephyrum tunc sceptrum dabat, cui nubilis atque
196 unica purpureos debebat nata nepotes,
197 elegit generum ; sed non ut deside luxu
198 fortuna soceri contentus et otia captans
199 nil sibi deberet ; comitis sed jure recepto
200 Danuvii ripas et tractum limitis ampli
201 circuit, hortatur, disponit, discutit, armat.
202 Sic sub patre Pius moderatus castra parentis,
203 sic Marcus vivente Pio, post jura daturi,
204 innumerabilibus legionibus imperitabant.
205 Hinc reduci datur omnis honos, et utrique magister
206 militiae consulque micat, conjuncta potestas
207 patricii, celerique gradu privata cucurrit
208 culmina conscenditque senum puer ipse curulem,
209 sedit et merito juvenis veteranus in auro.
210 Jamque parens divos : sed vobis nulla cupido
211 imperii ; longam diademata passa repulsam
212 insignem legere virum, quem deinde legentem
213 spernere non posses. Soli tibi contulit uni
214 hoc Fortuna decus, quamquam te posceret ordo,
215 ut lectus princeps mage quam videare relictus :
216 post socerum Augustum regnas, sed non tibi venit
217 purpura per thalamos et conjunx regia regno
218 laus potius quam causa fuit ; nam juris habenis
219 non generum legit respública, sed generosum.
220 Fallor, bis gemino nisi cardine rem probat orbis :
221 ambit te Zephyrus rectorem, destinat Eurus,
222 ad Boream pugnas et formidaris ad Austrum.
223 Ante tamen quam te socium collega crearet,
224 perstrinxisse libet quos Illyris ora triumphos
225 viderit, excisam quae se Valameris ab armis
226 forte ducis nostri vitio deserta gemebat.
227 Haud aliter, caesus quondam cum Caepio robur
228 dedidit Ausonium, subita cogente ruina,
229 electura ducem post guttura fracta Jugurthae
230 ultum Arpinatem Calpurnia foedera lixam
231 opposuit rabido respública territa Cimbro.
232 Hic primum ut vestras aquilas provincia vidit,
233 desiit hostiles confestim horrere dracones.
234 Ilicet edomiti bello praedaeque carentes
235 mox ipsi tua praeda jacent. Sed omittimus istos
236 ut populatores : belli magis acta revolvo.
237 Quod bellum non parva manus nec carcere fracto
238 ad gladiaturam tu, Spartace vincte, parasti,
239 sed Scythicae vaga turba plagae, feritatis abundans,
240 dira, rapax, vehemens, ipsis quoque gentibus illic
241 barbara barbaricis, cujus dux Hormidac atque
242 civis erat. Quis tale solum est moresque genusque.
243 Albus Hyperboreis Tanais qua vallibus actus
244 Riphaea de caute cadit, jacet axe sub Ursae
245 gens animis membrisque minax : ita vultibus ipsis
246 infantum suos horror inest. Consurgit in artum

247 massa rotunda caput ; geminis sub fronte cavernis
 248 visus adest oculis absentibus ; acta cerebri
 249 in cameram vix ad refugos lux pervenit orbes,
 250 non tamen et clausos ; nam fornice non spatioso
 251 magna vident spatia, et majoris luminis usum
 252 perspicua in puteis compensant puncta profundis.
 253 Tum, ne per malas excrescat fistula duplex,
 254 obtundit teneras circumdata fascia nares,
 255 ut galeis cedant : sic propter proelia natos
 256 maternus deformat amor, quia tensa genarum
 257 non interjecto fit latior area naso.
 258 Cetera pars est pulchra viris : stant pectora vasta,
 259 insignes umeri, succincta sub ilibus alvus.
 260 Forma quidem pediti media est, procera sed exstat
 261 si cernas equites ; sic longi saepe putantur
 262 si sedeant. Vix matre carens ut constitit infans,
 263 mox praebet dorsum sonipes ; cognata reare
 264 membra viris : ita semper equo ceu fixus adhaeret
 265 rector ; cornipedum tergo gens altera fertur,
 266 haec habitat. Teretes arcus et spicula cordi,
 267 terribiles certaeque manus jaculisque ferendae
 268 mortis fixa fides et non peccante sub ictu
 269 edoctus peccare furor. Gens ista repente
 270 erumpens solidumque rotis transvecta per Histrum
 271 venerat et siccas incidemat orbita lymphas.
 272 Hanc tu directus per Dacica rura vagantem
 273 contra is, aggredieris, superas, includis ; et ut te
 274 metato spatio castrorum Serdica vidit,
 275 obsidione premis. Quae te sic tempore multo
 276 in vallo positum stupuit, quod miles in agros
 277 nec licitis nec furtivis excursibus ibat.
 278 Cui deesset cum saepe Ceres semperque Lyaeus,
 279 disciplina tamen non defuit ; inde propinquo
 280 hoste magis timuere ducem. Sic denique factum est
 281 ut socius tum forte tuus, mox proditor, illis
 282 frustra terga daret commissae tempore pugnae.
 283 Qui jam cum fugeret flexo pede cornua nudans,
 284 tu stabas acies solus, te sparsa fugaci
 285 expetiit ductore manus, te Marte pedestri
 286 sudantem repetebat eques, tua signa secutus
 287 non se desertum sensit certamine miles.
 288 I nunc et veteris profer praeconia Tulli,
 289 aetas cana patrum, quod pulchro hortamine mendax
 290 occuluit refugi nutantia foedera Metti !
 291 Nil simile est fallique tuum tibi non placet hostem.
 292 Tunc vicit miles, dum se putat esse juvandum :
 293 hic vicit postquam se comperit esse relictum.
 294 Dux fugit : insequeris ; renovat certamina : vincis ;
 295 clauditur : expugnas ; elabatur : obruis atque
 296 Sarmaticae paci pretium sua funera ponis.
 297 Paretur ; jussum subiit jam transfuga letum
 298 atque peregrino cecidit tua victima ferro.
 299 Ecce iterum, si forte placet, conflige, vetustas !
 300 Hannibal ille ferox ad poenam forte petitus,
 301 etsi non habuit jus vitae fine supremo,
 302 certe habuit mortis : quem caecus carcer et uncus
 303 et quem exspectabat fracturus guttata lictor,
 304 hausit Bebrycio constantior hospite virus ;

305 nam te qui fugit, mandata morte peremptus,
 306 non tam victoris periit quam iudicis ore.
 307 Nunc ades, o Paeon, lauro cui grypas obuncos
 308 docta lupata ligant quotiens per frondea lora
 309 flectis penniferos hederis bicoloribus armos ;
 310 huc converte chelyn ; non est modo dicere tempus
 311 Pythona exstinctum nec bis septena sonare
 312 vulnera Tantalidum, quorum tibi funera servat
 313 cantus et aeterno vivunt in carmine mortes.
 314 Vos quoque, Castalides, paucis, quo numine nobis
 315 venerit Anthemius gemini cum foedere regnis,
 316 pandite : pax rerum misit qui bella gubernet.
 317 Auxerat Augustus naturae lege Severus
 318 divorum numerum. Quem mox Oenotria casum
 319 vidit ut aerei de rupibus Appennini,
 320 pergit caerulei vitreas ad Thybridis aedes,
 321 non galea conclusa genas (nec subtilis illi
 322 circulus inpactis loricam texuit hamis),
 323 sed nudata caput ; pro crine racemifer exit
 324 plurima per frontem constringens oppida palmes,
 325 perque umeros teretes, rutilantes perque lacertos
 326 pendula gemmiferae mordebant suppara bullae.
 327 Segnior incedit senio venerandaque membra
 328 viticomam retinens baculi vice flectit ad ulmum.
 329 Sed tamen Ubertas sequitur ; quaecumque propinquat,
 330 incessu fecundat iter ; comitataque gressum
 331 laeta per impressas rorat Vindemia plantas.
 332 Illicet ingreditur Tiberini gurgutis antrum.
 333 Currebat fluvius residens et harundinis altae
 334 concolor in viridi fluitabat silva capillo ;
 335 dat sonitum mento unda cadens, licet hispida saetis
 336 suppositis multum sedaret barba fragorem ;
 337 pectore ructabat latices lapsuque citato
 338 sulcabat madidam jam torrens alveus alvum.
 339 Terretur veniente dea manibusque remissis
 340 remus et urna cadunt. Veniae tum verba paranti
 341 illa prior : "Venio viduatam praesule nostro
 342 per te, si placeat, lacrimis inflectere Romam ;
 343 expetat Aurorae partes fastuque remoto
 344 hoc unum praestet, jam plus dignetur amari.
 345 Instrue quas quaerat vires orbique jacenti
 346 quo poscat dic orbe caput. Quemcumque creavit
 347 axe meo natum, confestim fregit in illo
 348 imperii Fortuna rotas. Hinc Vandalus hostis
 349 urget et in nostrum numerosa classe quotannis
 350 militat excidium, conversoque ordine fati
 351 torrida Caucaseos infert mihi Byrsa furores.
 352 Praeterea invictus Ricimer, quem publica fata
 353 respiciunt, proprio solus vix Marte repellit
 354 piratam per rura vagum, qui proelia vitans
 355 victorem fugitivus agit. Quis sufferat hostem
 356 qui pacem pugnamque negat ? Nam foedera nulla
 357 cum Ricimere jacit. Quem cur nimis oderit audi.
 358 Incertum crepat ille patrem, cum serva sit illi
 359 certa parens ; nunc, ut regis sit filius, effert
 360 matris adulterium. Tum livet quod Ricimerem
 361 in regnum duo regna vocant ; nam patre Suebus,
 362 a genetrice Getes. Simul et reminiscitur illud,

363 quod Tartesiacis avus hujus Vallia terris
364 Vandalicas turmas et juncti Martis Halanos
365 stravit et occiduam texere cadavera Calpen.
366 Quid veteres narrare fugas, quid damna priorum ?
367 Agrigentini recolit dispendia campi.
368 Inde furit, quod se docuit satis iste nepotem
369 illius esse viri quo viso, Vandale, semper
370 terga dabas. Nam non Siculis inlustrior arvis
371 tu, Marcelle, redis, per quem tellure marique
372 nostra Syracusios presserunt arma penates ;
373 nec tu cui currum Curii superare, Metelle,
374 contigit, ostentans nobis elephanta frequentem,
375 grex niger albentes tegeter cum mole jugales
376 auctoremque suum celaret pompa triumphi.
377 Noricus Ostrogothum quod continet, iste timetur ;
378 Gallia quod Rheni Martem ligat, iste pavori est ;
379 quod consanguineo me Vandalus hostis Halano
380 diripuit radente, suis hic ultus ab armis.
381 Sed tamen unus homo est nec tanta pericula solus
382 tollere, sed differre potest. Modo principe nobis
383 est opus armato, veterum qui more parentum
384 non mandet sed bella gerat, quem signa moventem
385 terra vel unda tremant, ut tandem jure recepto
386 Romula desuetas moderentur classica classes."
387 Audiit illa pater, simul annuit. Itur in urbem.
388 Continuo videt ipse deam, summissus adorat,
389 pectus et exsertam tetigerunt cornua mammam ;
390 mandatas fert inde preces. Quas diva secuta
391 apparat ire viam. Laxatos torva capillos
392 stringit et inclusae latuerunt casside turrets ;
393 infula laurus erat. Bullis hostilibus asper
394 applicat a laeva surgentem balteus ensem.
395 Inseritur clipeo victrix manus ; illius orbem
396 Martigenae, lupa, Thybris, Amor, Mars, Ilia complent.
397 Fibula mordaci refugas a pectore vestes
398 dente capit. Micat hasta minax, quercusque tropaeis
399 curva tremit placitoque deam sub fasce fatigat.
400 Perpetuo stat planta solo, sed fascia primos
401 sistitur ad digitos, retinacula bina cothurnis
402 mittit in adversum vincto de fomite pollex,
403 quae stringant crepidas et concurrentibus ansis
404 vinculorum pandas texant per crura catenas.
405 Ergo sicut erat liquidam transvecta per aethram
406 nascentis petiit tepidos Hyperionis ortus.
407 Est locus Oceani, longinquis proximus Indis,
408 axe sub Eoo, Nabataeum tensus in Eurum :
409 ver ibi continuum est, interpellata nec ullis
410 frigoribus pallescit humus, sed flore perenni
411 picta peregrinos ignorant arva rigores ;
412 halant rura rosis, indescriptosque per agros
413 fragrat odor ; violam, cytisum, serpylla, ligustrum,
414 lilia, narcissos, casiam, colocasia, caltas,
415 costum, malobathrum, myrrhas, opobalsama, tura
416 parturiunt campi ; nec non pulsante senecta
417 hinc rediviva petit vicinus cinnama Phoenix.
418 Hic domus Aurorae rutilo crustante metallo
419 bacarum praefert leves asprata lapillos.
420 Diripiunt diversa oculos et ab arte magistra

421 hoc vincit, quodcumque vides ; sed conditur omnis
 422 sub domina praesente decor, nimioque rubore
 423 gemmarum varios perdit, quia possidet, ignes.
 424 Fundebat coma pexa crocos flexoque lacerto
 425 lutea depressus comebat tempora pecten.
 426 Fundebant oculi radios ; color igneus illis,
 427 non tamen ardor erat, quamvis de nocte recussa
 428 excepti soleant sudorem fingere rores.
 429 Pectora bis cingunt zonae, parvisque papillis
 430 invidiam facit ipse sinus ; pars extima pepili
 431 perfert puniceas ad crura rubentia rugas.
 432 Sic regina sedet solio ; sceptri vice dextem
 433 lampadis hasta replet. Nox adstat proxima divae,
 434 jam refugos conversa pedes, ac pone tribunal
 435 promit Lux summum vix intellecta cacumen.
 436 Hinc Romam liquido venientem tramite cernens
 437 exsiluit propere et blandis prior orsa loquellis :
 438 "Quid, caput o mundi," dixit, "mea regna revisis ?
 439 Quidve jubes ? " Paulum illa silens atque aspera miscens
 440 mitibus haec coepit : "Venio (desiste moveri
 441 nec multum trepida), non ut mihi pressus Araxes
 442 imposito sub ponte fluat nec ut ordine prisco
 443 Indicus Ausonia potetur casside Ganges,
 444 aut ut tigriferi pharetrata per arva Niphatis
 445 depopuletur ovans Artaxata Caspia consul.
 446 Non Pori modo regna precor nec ut hisce lacertis
 447 frangat Hydaspeas aries inpactus Erythras.
 448 Non in Bactra feror nec committentia pugnas
 449 nostra Semiramiae rident ad classica portae.
 450 Arsacias non quaero domus nec tessera castris
 451 in Ctesiphonta datur. Totum hunc tibi cessimus axem,
 452 et nec sic mereor nostram ut tueare senectam ?
 453 Omne quod Euphraten Tigrimque interjacet olim
 454 sola tenes : res empta mihi est de sanguine Crassi ;
 455 ad Carrhas pretium scripsi ; nec inulta remansi
 456 aut periit sic emptus ager ; si fallo, probasti,
 457 Ventidio mactate Sapor. Nec sufficit istud :
 458 Armenias Pontumque dedi, quo Marte petitum
 459 dicat Sylla tibi ; forsan non creditur uni :
 460 consule Lucillum. Taceo jam Cycladas omnes ;
 461 adquisita meo servit tibi Creta Metello.
 462 Transcripsi Cilicas : hos Magnus fuderat olim.
 463 Adjeci Syriae, quos nunc moderaris, Isauros :
 464 hos quoque sub nostris domuit Servilius armis.
 465 Concessi Aetolos veteres Acheloiisque arva,
 466 transfudi Attalicum male credula testamentum,
 467 Epirum retines : tu scis cui debeat illam
 468 Pyrrhus. In Illyricum specto te mittere jura
 469 ac Macetum terras : et habes tu, Paule, nepotes !
 470 Aegypti frumenta dedi : mihi vicerat olim
 471 Leucadiis Agrippa fretis. Judaea tenetur
 472 sub ditione tua, tamquam tu miseris illuc
 473 insignem cum patre Titum. Tibi Cypria merces
 474 fertur : pugnaces ego pauper laudo Catones.
 475 Dorica te tellus et Achaica rura tremiscunt,
 476 tendis et in bimarem felicia regna Corinthon :
 477 dic, Byzantinus quis rem tibi Mummius egit ?
 478 Sed si forte placet veteres sopire querellas,

479 Anthemium concede mihi. Sit partibus istis
480 Augustus longumque Leo ; mea jura gubernet
481 quem petii ; patrio vestiri murice natam
482 gaudeat Euphemiam sidus divale parentis.
483 Adice praeterea privatam ad publica foedus :
484 sit socer Augustus genero Ricimere beatus ;
485 nobilitate micant : est vobis regia virgo,
486 regius ille mihi. Si concors annuis istud,
487 mox Libyam sperare dabis. Circumspice taedas
488 antiquas : par nulla tibi sic copula praesto est.
489 Proferat hic veterum thalamos discrimine partos
490 Graecia, ni pudor est : reparatis Pisa quadrigis
491 suscitet Oenomaum, natae quem fraude cadentem
492 cerea destituit resolutis axibus obex ;
493 procedat Colchis prius agnita virgo marito
494 crimine quam sexu ; spectet de carcere circi
495 pallentes Atalanta procos et poma decori
496 Hippomenis jam non pro solo colligat auro ;
497 Dejanira, tuas Achelous gymnade pinguis
498 illustret taedas et ab Hercule pressus anhelos
499 lassatum foveat rivis rivalibus hostem.
500 Quantumvis repetam veteris conubia saeculi,
501 transcendunt hic heroas, heroidas illa.
502 Hos thalamos, Ricimer, Virtus tibi pronuba poscit
503 atque Dionaeam dat Martia laurea myrtum.
504 Ergo age, trade virum non otia pigra foventem
505 deliciisque gravem, sed quem modo nauticus urit
506 aestus Abydenique sinus et Sestias ora
507 Hellespontiatis circumclamata procellis ;
508 quas pelagi fauces non sic tenuisse vel illum
509 crediderim cui ruptus Athos, cui remige Medo
510 turgida silvosam currebant vela per Alpem ;
511 nec Lucullanis sic haec freta cincta carinis,
512 segnis ad insignem sedit cum Cyzicon hostis,
513 qui cogente fame cognata cadavera mandens
514 vixit morte sua. Sed quid mea vota retardo ?
515 Trade magis." Tum pauca refert Tithonia conjunx :
516 "Duc age, sancta parens, quamquam mihi maximus usus
517 invicti summique ducis, dum mitior exstes
518 et non disjunctas melius moderemur habenas.
519 Nam si forte placet veterum meminisse laborum,
520 et qui pro patria vestri pugnaret Iuli,
521 ut nil plus dicam, prior hinc ego Memnona misi."
522 Finierant ; geminas junxit Concordia partes,
523 electo tandem potitur quod principe Roma.
524 Nunc aliquos voto simili vel amore, Vetustas,
525 te legisse crepa, numquam non invida summis
526 emeritisque viris. Brenni contra arma Camillum
527 profer ab exilio Cincinnatoque secures
528 expulso Caesone refer flentemque parentem
529 a rastris ad rostra roga, miseroque tumultu
530 pelle prius, quos victa petas ; si ruperit Alpes
531 Poenus, ad adflictos condemnatosque recurrere ;
532 improbus ut rubeat Barcina clade Metaurus,
533 multatus tibi consul agat, qui milia fundens
534 Hasdrubalis, rutilum sibi cum fabricaverit ensem,
535 concretum gerat ipse caput. Longe altera nostri
536 gratia iudicii est : scit se non laesus amari.

537 Sed mea jam nimii propellunt carbasa flatus ;
 538 siste, Camena, modo tenues, portumque petenti
 539 jam placido sedeat mihi carminis ancora fundo.
 540 At tamen, o Princeps, quae nunc tibi classis et arma
 541 tractentur, quam magna geras quam tempore parvo,
 542 si mea vota Deus produxerit, ordine recto
 543 aut genero bis mox aut te ter consule dicam.
 544 Nam modo nos jam festa vocant, et ad Ulpia poscunt
 545 te fore, donabis quos libertate, Quirites,
 546 quorum gaudentes exceptant verbera malae.
 547 Perge, pater patriae, felix atque omine fausto
 548 captivos vincture novos absolve vetustos.

AD LIBELLUM

S3 v.1 Quid faceret laetas segetes, quod tempus amandum
 2 messibus et gregibus, vitibus atque apibus,
 3 ad Maecenatis quondam sunt edita nomen ;
 4 hinc, Maro, post audes arma virumque loqui.
 5 At mihi Petrus erit Maecenas temporis hujus ;
 6 nam famae pelagus sidere curro suo.
 7 Si probat, emittit, si damnat carmina, celat,
 8 nec nos ronchisono rhinocerote notat.
 9 I, liber : hic nostrum tutatur, crede, pudorem ;
 10 hoc censore etiam displicuisse placet.

PRAEFATIO PANEGYRICI DICTI DOMINO IMP.CAES.IULIO VALERIO MAIORIANO AUGUSTO

S4 v.1 Tityrus ut quondam patulae sub tegmine fagi
 2 volveret inflatos murmura per calamos,
 3 praestitit afflicto jus vitae Caesar et agri,
 4 nec stetit ad tenuem celsior ira reum ;
 5 sed rus concessum dum largo in principe laudat,
 6 caelum pro terris rustica Musa dedit ;
 7 nec fuit inferius Phoebelia dona referre :
 8 fecerat hic dominum, fecit et ille deum.
 9 Et tibi, Flacce, acies Bruti Cassique secuto
 10 carminis est auctor qui fuit et veniae.
 11 Sic mihi diverso nuper sub Marte cadenti
 12 jussisti invicto, victor, ut essem animo.
 13 Serviat ergo tibi servati lingua poetae
 14 atque meae vitae laus tua sit pretium.
 15 Non ego mordaci fodiam modo dente Maronem
 16 nec civem carpam, terra Sabella, tuum.
 17 Res minor ingenio nobis, sed Caesare major ;
 18 vincant eloquio, dummodo nos domino.

PANEGYRICUS

S5 v.1 Concipe praeteritos, respublica, mente triumphos :
 2 imperium jam consul habet, quem purpura non plus
 3 quam lorica operit, cujus diademata frontem
 4 non luxu sed lege tegunt, meritisque laborum
 5 post palmam palmata venit ; decora omnia regni
 6 accumulans fasces et princeps consule crescit.

7 Personat ergo tuum caelo, rure, urbibus, undis
8 exsultans Europa sophos, quod rector haberis,
9 victor qui fueras. Fateor, trepidaverat orbis,
10 dum non vis vicisse tibi nimioque pudore
11 quod regnum mereare doles tristisque repulsa
12 non moderanda subis quae defendenda putasti.
13 Sederat exserto bellatrix pectore Roma,
14 cristatum turrita caput, cui pone capaci
15 casside prolapsus perfundit terga capillus.
16 Laetitiam censura manet terrorque pudore
17 crescit, et invita superat virtute venustas.
18 Ostricolor pepli textus, quem fibula torto
19 mordax dente forat ; tum quidquid mamma refundit
20 tegminis, hoc patulo concludit gemma recessu.
21 Hinc fulcit rutilus spatioso circite laevum
22 umbo latus ; videas hic crasso fusa metallo
23 antra Rheae fetamque lupam, quam fauce resecta
24 blandiri quoque terror erat ; quamquam illa vorare
25 Martigenas et picta timet. Pars proxima Thybrim
26 exprimit ; hic scabri fusus sub pumice tofi
27 proflabat madidum per guttura glauca soporem ;
28 pectus palla tegit, quam neverat Ilia conjunx,
29 liquenti quae juncta toro vult murmura lymphis
30 tollere et undosi somnum servare mariti.
31 Ista micant clipeo ; cuspis trabe surgit eburna,
32 ebria caede virum. Propter Bellona tropaeum
33 exstruit et quercum captivo pondere curvat.
34 Consurgit solium saxis quae caesa rubenti
35 Aethiopum de monte cadunt, ubi sole propinquo
36 nativa exustas adflavit purpura rupes.
37 Jungitur hic Synnas, Nomadum lapis additur istic,
38 antiquum mentitus ebur ; post caute Laconum
39 marmoris herbosi radians interviret ordo.
40 Ergo ut se mediam solio dedit, advolat omnis
41 terra simul. Tum quaeque suos provincia fructus
42 exposuit : fert Indus ebur, Chaldaeus amomum,
43 Assyrius gemmas, Ser vellera, tura Sabaeus,
44 Atthis mel, Phoenix palmas, Lacedaemon olivum,
45 Arcas equos, Epirus equas, pecuaria Gallus,
46 arma Chalybs, frumenta Libys, Campanus Iacchum,
47 aurum Lydus, Arabs guttam, Panchaia myrrham,
48 Pontus castorea, blattam Tyrus, aera Corinthus ;
49 Sardinia argentum, naves Hispania defert
50 fulminis et lapidem : scopulos jaculabile fulgur
51 fucat et accensam silicem fecunda maritat
52 ira deum ; quotiens caelum se commovet illic,
53 plus ibi terra valet. Subito flens Africa nigras
54 procubuit lacerata genas et cernua frontem
55 jam male fecundas in vertice fregit aristas
56 ac sic orsa loqui : "Venio pars tertia mundi,
57 infelix felice uno. Famula satus olim
58 hic praedo et dominis extinctis barbara dudum
59 sceptrata tenet tellure mea penitusque fugata
60 nobilitate furens quod non est non amat hospes.
61 O Latii sopite vigor, tua moenia ridet
62 insidiis cessisse suis : non concutis hastam ?
63 Non pro me vel capta doles ? Tua nempe putantur
64 surgere fata malis et celsior esse ruina.

65 Sed melius, quod terror abit ; jam vincere restat,
66 si pugnas, ut victa soles. Porsenna superbum
67 Tarquinium impingens complevit milite Tusco
68 Janiculum quondam ; sed dum perrumpere portas
69 obsidione parat totam te pertulit uno
70 Coclitis in clipeo ; presserunt milia solum
71 multa virum pendente via ; nec ponte soluto
72 cum caderet cecidit. Rex idem denique morte
73 admonitus scribae didicit sibi bella moveri
74 non solum cum bella forent ; mox pace petita
75 in regnum rediit, non tam feriente fugatus
76 quam flagrante viro. Steterat nam corde gelato
77 Scaevola et apposito dextram damnaverat igni,
78 plus felix peccante manu, cum forte satelles
79 palleret constante reo tormentaue capti
80 is fugeret, qui tortor erat. Brennum tremuisti,
81 post melior ; quodcumque tuum est, quodcumque vocaris,
82 jam solus Tarpeius erat ; sed reppulit unus
83 tum quoque totam aciem, Senones dum garrulus anser
84 nuntiat et vigilat vestrum sine milite fatum.
85 Me quoque (da veniam quod bellum gessimus olim)
86 post Trebiam Cannasque domas, Romanaque tecta
87 Hannibal ante meus quam nostra Scipio vidit.
88 Quid merui ? fatis cogor tibi bella movere,
89 cum volo, cum nolo. Trepidus te territat hostis,
90 sed tutus claudente freto, velut hispidus alta
91 sus prope tesqua jacet claususque cacuminat albis
92 os nigrum telis gravidum ; circumlatrat ingens
93 turba canum, si forte velit concurrere campo ;
94 ille per objectos vepres tumet atque superbit,
95 vi tenuis fortisque loco, dum proximus "heia ! "
96 Venator de colle sonet : vox nota magistri
97 lassatam reparat rabiem ; tum vulnera caecus
98 fastidit sentire furor. Quid proelia differs ?
99 quid mare formidas, pro cuius saepe triumphis
100 et caelum pugnare solet ? quid quod tibi princeps
101 est nunc eximius, quem praescia saecula clamant
102 venturum excidio Libyae, qui tertius ex me
103 accipiet nomen ? Debent hoc fata labori,
104 Majoriane, tuo. Quem cur conscendere classem
105 ac portus intrare meos urbemque subire,
106 si jubeas, cupiam, paucis ex ordine fabor.
107 "Fertur, Pannoniae qua Martia pollet Acincus,
108 Illyricum rexisse solum cum tractibus Histri
109 hujus avus ; nam Theudosius, quo tempore Sirmi
110 Augustum sumpsit nomen, per utramque magistrum
111 militiam ad partes regnis venturus Eoas,
112 Majorianum habuit. Latiis sunt condita fastis
113 facta ducis, quoties Scythicis inlata colonis
114 classica presserunt Hypanim, Peucenque rigentem
115 mente salutatis inrisit lixa pruinis.
116 Hunc socerum pater hujus habet, vir clarus et uno
117 culmine militiae semper contentus, ut unum
118 casibus in dubiis junctus sequeretur amicum.
119 Non semel oblatis temptavit fascibus illum
120 Aetio rapere aula suo, sed perstitit ille,
121 major honoratis : coepit pretiosior esse
122 sic pretio non capta fides. Erat ille quod olim

123 quaestor consulibus : tractabat publica jure
124 aera suo : tantumque modum servabat ut illum
125 narraret rumor jam rebus parcere nati.
126 "Senserat hoc sed forte ducis jam livida conjunx
127 augeri famam pueri, suffusaque bili
128 coxerat internum per barbara corda venenum.
129 Ilicet explorat caelum totamque volutis
130 percurrit mathesim numeris, interrogat umbras,
131 fulmina rimatur, fibras videt, undique gaudens
132 secretum rapuisse deo. Sic torva Pelasgum
133 Colchis in aplustri steterat trepidante marito
134 Absyrtum sparsura patri facturaque caesi
135 germani plus morte nefas, dum funere pugnat
136 et fratrem sibi tela facit ; vel cum obruit ignem
137 taurorum plus ipsa calens textitque trementem
138 frigida flamma virum, quem defendente veneno
139 inter flagrantem perhibent alsisse juvencos.
140 "Ergo animi dudum impatiens, postquam audiit isti
141 imperium et longum statui, laniata lacertos
142 ingreditur, qua strata viri, vocemque furentem
143 his rupit : "Secure jaces, oblite tuorum,
144 o piger, et mundo princeps (sic saecula poscunt)
145 Majorianus erit. Clamant hoc sidera signis,
146 hoc homines votis. Isti quid sidera quaero,
147 fatum aliud cui fecit amor ? Nil fortius illo.
148 Et puer est cupidus numquam, sed parcus habendi ;
149 pauper adhuc jam spargit opes, ingentia suadet
150 consilia et sequitur ; totum quod cogitat altum est ;
151 urget quod sperat. Ludum si forte retexam,
152 consumit quidquid jaculis fecisse putaris
153 istius una dies : tribus hunc tremuere sagittis
154 anguis, cervus, aper. Non sic libravit in hostem
155 spicula qui nato serpentis corpore cincto
156 plus timuit cum succurrit, dum jactibus isdem
157 interitum vitamque daret stabilemque teneret
158 corde tremente manum, totamque exiret in artem
159 spe propiore metus, dans inter membra duorum
160 unius mortem. Libeat decernere caestu :
161 cessit Eryx Siculus, simili nec floruit arte
162 Sparta, Therapnaea pugilem cum gymnade pinguem
163 stratus Bebryciis Amycus suspexit harenis.
164 Qui vigor in pedibus ! frustra sibi natus Ophelte
165 Sicaniam tribuit palmam, plantasque superbas
166 haud ita per siccam Nemeen citus extulit Arcas,
167 cujus in Aetolo volitantem pulvere matrem
168 horruit Hippomenes, multo qui caespite circi
169 contemptu praemissus erat, cum carceris antro
170 emicuit pernix populo trepidante virago,
171 nil toto tactura gradu, cum pallidus ille
172 respiceret medium post se decrescere campum
173 et longas ad signa vias flatuque propinquo
174 pressus in hostili jam curreret anxius umbra,
175 donec ad anfractum metae jam jamque relictus
176 concita ter sparso fregit vestigia pomo.
177 Qui videt hunc equitem Ledaeum spernit alumnum
178 ac juvenem, Sthenoboea, tuum, cui terga vetustas
179 pennati largitur equi Lyciamque Chimaeram
180 quem superasse refert, vulnus cum sustulit unum

181 tres animas. Vitam tum si tibi fata dedissent,
 182 Majoriane ferox, vetuisses Castora frenos,
 183 Pollucem caestus, Alconem spicula nosse,
 184 Bellerophonteis insultaturus opimis.
 185 Si clipeum capiat, vincit Telamone creatum,
 186 qui puppes inter Graias contra Hectoris ignem
 187 ipsam etiam infidi classem defendit Ulixis.
 188 Missile si quanto jaculetur pondere quaeris,
 189 segnius insertae trepidans pro fasce Camillae
 190 excussit telum Metabus, nec turbine tanto
 191 stridula Pelidae per Troilon exiit ornus ;
 192 nec sic Heroum tardantem busta Creontem
 193 Atticus Aegides rupit Marathonide quercu ;
 194 nec sic intortum violatae Phoebados ultrix
 195 in Danaos fulmen jecit, cum Graecia Trojae
 196 noctem habuit similemque facem fixusque Capherei
 197 cautibus inter aquas flammam ructabat Oileus.
 198 Parva loquor. Quid quod, quotiens tibi bella geruntur,
 199 discipulus non miles adest ? et fingit alumnum,
 200 aemulus e contra spectat. Quod viceris odit
 201 et quos vincis amat. Totus dormitat ad istum
 202 magnus Alexander, patris quem gloria torsit.
 203 Quid faciam infelix ? gnato quae regna parabo
 204 exclusa sceptris Geticis, respublica si me
 205 praeterit et parvus super hoc Gaudentius hujus
 206 calcatur fatis ? Istum jam Gallia laudat
 207 quodque per Europam est. Rigidis hunc abluit undis
 208 Rhenus, Arar, Rhodanus, Mosa, Matrona, Sequana, Ledus,
 209 Clitis, Elaris, Atax, Vacalis, Ligerimque bipenni
 210 excisum per frusta bibit. Cum bella timentes
 211 defendit Turonos, aberas ; post tempore parvo
 212 pugnastis pariter, Francus qua Cloio patentes
 213 Atrebatum terras pervaserat. Hic coeuntes
 214 claudebant angusta vias arcuque subactum
 215 vicum Helenam flumenque simul sub tramite longo
 216 artus suppositis trabibus transmiserat agger.
 217 Illic te posito pugnabat ponte sub ipso
 218 Majorianus eques. Fors ripae colle propinquo
 219 barbaricus resonabat hymen Scythicisque choreis
 220 nubebat flavo similis nova nupta marito.
 221 Hos ergo, ut perhibent, stravit ; crepitabat ad ictus
 222 cassis et oppositis hastarum verbera thorax
 223 arcebat et squamis, donec conversa fugatus
 224 hostis terga dedit ; plaustri rutilare videres
 225 barbarici vaga festa tori conjectaque passim
 226 fercula captivasque dapes cirroque madente
 227 ferre coronatos redolentia sarta lebetas.
 228 Illicet increscit Mavors thalamique refringit
 229 plus ardens Bellona faces ; rapit esseda victor
 230 nubentemque nurum. Non sic Pholoetica monstra
 231 atque Pelethronios Lapithas Semeleius Euhan
 232 miscuit, Haemonias dum flammant orgia matres
 233 et Venerem Martemque cient ac prima cruentos
 234 consumunt ad bella cibos Bacchoque rotato
 235 pocula tela putant, cum crudescente tumultu
 236 polluit Emathium sanguis Centauricus Othryn.
 237 "Nec plus nubigenum celebrentur jurgia fratrum :
 238 hic quoque monstra domat, rutili quibus arce cerebri

239 ad frontem coma tracta jacet nudataque cervix
240 saetarum per damna nitet, tum lumine glauco
241 albet aquosa acies ac vultibus undique rasis
242 pro barba tenues perarantur pectine cristae.
243 Strictius assutae vestes procera cohercent
244 membra virum, patet his altato tegmine poples,
245 latus et angustam suspendit balteus alvum.
246 Excussisse citas vastum per inane bipennes
247 et plagae praescisse locum clipeosque rotare
248 ludus et intortas praecedere saltibus hastas
249 inque hostem venisse prius. Puerilibus annis,
250 est belli maturus amor. Si forte premantur
251 seu numero seu sorte loci, mors obruit illos,
252 non timor ; invicti perstant animoque supersunt
253 jam prope post animam. Tales te teste fugavit
254 et laudante viros. Quisnam ferat ? Omnia tecum,
255 te sine multa facit ; pugnant pro principe cuncti :
256 quam timeo, ne jam iste sibi ! Si regna tenebit,
257 huic vincis, quodcumque domas. Nil fata relinquunt
258 hic medium : percussor enim se respuis esse,
259 servus eris. Certe recto si tramite servat
260 sidera Chaldaeus, novit si gramina Colchus,
261 fulgura si Tuscus, si Thessalus elicit umbras,
262 si Lyciae sortes sapiunt, si nostra volatu
263 fata locuntur aves, doctis balatibus Hammon
264 si sanctum sub Syrte gemit, si denique verum,
265 Phoebe, Themis, Dodona, canis, post tempora nostra
266 Julius hic Augustus erit. Coniunctus amore
267 praeterea est juveni, grandis quem spiritus armat
268 regis avi. Quo te veritas ? ad culmina mundi
269 hic fatum fert, ambo animum. Consurge simulque
270 aggredere ignaros ; neutrum mactare valebis,
271 si jubeas utrumque mori ; sed nocte dolosas
272 blanditias uni, ferro tamen iste petatur.
273 Quid loquor incassum ? nihil est quod tanta cavemus :
274 ut regnet victurus erit ! " Commotus in iras
275 Aetius sic pauca refert : " Compesce furentis
276 impia vota animi. Mortem mandare valebo
277 insontis, taceam nostri ? Quisquamne precatur
278 ut sine criminibus crimen fiat bene nasci ?
279 Ad poenam quis fata vocet ? Tua viscera ferro,
280 Majoriane, petam, Phoebus si nocte refulget,
281 Luna die, duplex ponto si plaustra novatur
282 Parrhasis, Atlantem Tanais, si Bagra da cernit
283 Caucason, Hercynii nemoris si stipite lintris
284 texta Nabataeum pro Rheno sulcat Hydaspem,
285 si bibit Hispanus Gangem tepidisque ab Erythris
286 ad Tartesiaceum venit Indus aquator Hiberum,
287 si se Pollucis perfundit sanguine Castor,
288 Thesea Pirithoi, Pyladen si stravit Orestae
289 vel furibunda manus, raperet cum Taurica sacra
290 matricida pius. Sed ne sprevisse dolorem
291 forte tuum videar, vivat careatque parumper
292 militia. Heu ! potuit nobis, nisi triste putasses,
293 fortunam debere suam. " Sic fatur et illum
294 rure jubet patrio suetos mutare labores,
295 fatorum currente rota, quo disceret agri
296 quid possessorem maneat, quos denique mores

297 jus civile paret, ne solam militis artem
298 ferret ad imperium. Suspenderat ilicet arma
299 emeritus juvenis, sterilis jejunia terrae
300 vomere fecundans. Sic quondam consule curvo
301 vertebas campos, paulum si pace sequestra
302 classica laxasses, fortis cui laeva regebat
303 stivam post aquilas, humili dum juncta camino
304 victoris fumum biberet palmata bubulci.
305 "Principis interea gladio lacrimabile fatum
306 clauserat Aetius ; cujus quo tutius ille
307 magna Palatinis conjungeret agmina turmis,
308 evocat hunc precibus. Sed non se poena moratur
309 sanguinis effusi (numerum collegerat ergo,
310 non animum populi) ; ferri mala crimina ferro
311 solvit et in vestram plus concidit ille ruinam.
312 Jam tunc imperium praesentis principis aurea
313 volvebant bona fata colu ; sed publica damna
314 invidiam fugere viri. Quicumque fuerunt
315 nomen in Augustum lecti, tenere relictum
316 Caesaribus solium ; postquam tu capta laboras,
317 hic quod habet fecit. Trajanum Nerva vocavit,
318 cum pignus jam victor erat : Germanicus esset
319 ut titulis, meritis fuerat. Res ordine currit ;
320 hanc ambit famam quisquis sic incipit. Olim
321 post Capreas Tiberi, post turpia numina Gai,
322 censuram Claudii, citharam thalamosque Neronis,
323 post speculi immanis pompam, quo se ille videbat
324 hinc turpis, quod pulcher, Otho, post quina Vitelli
325 milia famosi ventris damnata barathro,
326 his titulis princeps lectus similique labore
327 Vespasianus erat. Sed ne fortasse latronis
328 me clausam virtute putes, consumpsit in illo
329 vim gentis vitae vitium ; Scythicam feritatem
330 non vires, sed vota tenent, spoliisque potitus
331 immensis robur luxu jam perdidit omne
332 quo valuit dum pauper erat. Mea viscera pro se
333 in me nunc armat ; laceror tot capta per annos
334 jure suo, virtute mea, fecundaque poenis
335 quos patiar pario. Propriis nil conficit armis :
336 Gaetulis, Nomadis, Garamantibus Autololisque,
337 Arzuge, Marmarida, Psyllo, Nasamone timetur
338 segnis, et ingenti ferrum jam nescit ab auro.
339 Ipsi autem color exsanguis, quem crapula vexat
340 et pallens pinguedo tenet, ganeaue perenni
341 pressus acescentem stomachus non explicat auram.
342 Par est vita suis. Non sic Barcaeus opimam
343 Hannibal ad Capuam periit, cum fortia bello
344 inter delicias mollirent corpora Baiae
345 et, se Lucrinas qua vergit Gaurus in undas
346 bracchia Massylus jactaret nigra natator.
347 Atque ideo hunc dominum saltem post saecula tanta
348 ultorem mihi redde, precor, ne dimicet ultra
349 Carthago Italiam contra." Sic fata dolore
350 ingemuit lacrimisque preces adjuvit obortis.
351 Hic haec Roma refert : "Longas succinge querelas,
352 o devota mihi ; vindex tibi nomine divum
353 Majorianus erit. Sed paucis pauca retexam.
354 Ex quo Theodosius communia jura fugato

355 reddidit auctoris fratri, cui guttura fregit
356 post in se vertenda manus, mea Gallia rerum
357 ignoratur adhuc dominis ignaraque servit.
358 Ex illo multum periit, quia principe clauso,
359 quisquis erat, miseri diversis partibus orbis
360 vastari sollemne fuit. Quae vita placeret,
361 cum rector moderandus erat ? Contempta tot annos
362 nobilitas jacuit ; pretium respublica forti
363 rettulit invidiam. Princeps haec omnia noster
364 corrigit atque tuum vires ex gentibus addens
365 ad bellum per bella venit ; nam maximus isse est,
366 non pugnasse labor. Terimus cur tempora verbis ?
367 Pervenit et vincit." Tali sermone peractum
368 concilium, verbisque deae famulante metallo
369 aurea concordēs traxerunt fila sorores.
370 Hos me quos cecini Romae Libyaeque labores
371 vota hominum docuere loqui ; jam tempus ad illa
372 ferre pedem quae fanda mihi vel Apolline muto :
373 pro Musis Mars vester erit. Conscenderat Alpes
374 Raetorumque jugo per longa silentia ductus
375 Romano exierat populato trux Alamannus
376 perque Cani quondam dictos de nomine campos
377 in praedam centum noviens dimiserat hostes.
378 Jamque magister eras ; Burconem dirigis illuc
379 exigua comitante manu. Sed sufficit istud,
380 cum pugnare jubes ; certa est victoria nostris
381 te mandasse acies ; peragit fortuna triumphum
382 non populo, sed amore tuo ; nolo agmina campo
383 quo mittis paucos. Felix te respicit iste
384 eventus belli ; certatum est jure magistri,
385 Augusti fato. Nuper ferox hostis aperto
386 errabat lentus pelago, postquam ordine vobis
387 ordo omnis regnum dederat, plebs, curia, miles,
388 et collega simul. Campanam flantibus Austris
389 ingrediens terram securum milite Mauro
390 agricolam aggreditur ; pinguis per transtra sedebat
391 Vandalus opperiens praedam, quam jusserat illuc
392 captivo capiente trahi. Sed vestra repente
393 inter utrumque hostem dederant sese agmina planis
394 quae pelagus collemque secant portumque reducto
395 efficiunt flexu fluvii. Perterrita primum
396 montes turba petit, trabibus quae clausa relictis
397 praedae praeda fuit. Tum concitus agmine toto
398 in pugnam pirata coit : pars lintre cavata
399 jam dociles exponit equos, pars ferrea texta
400 concolor induitur, teretes pars explicat arcus
401 spiculaque infusum ferro latura venenum,
402 quae feriant bis missa semel. Jam textilis anguis
403 discurrit per utramque aciem, cui guttur adactis
404 turgescit zephyris ; patulo mentitur hiatu
405 iratam pictura famem, pannoque furorem
406 aura facit, quotiens crassatur vertile tergum
407 flatibus et nimium jam non capit alvus inane.
408 At tuba terrisono strepuit grave rauca fragore,
409 responsat clamor lituis, virtusque repente
410 ignavis vel parva furit. Cadit undique ferrum,
411 hinc tamen in jugulos : hunc torta falarica jactu
412 proterit, ad mortem vix cessatura secundam ;

413 hunc conti rotat ictus equo ; ruit aclyde fossus
414 ille veruque alius ; jacet hic simul alite telo,
415 absentem passus dextram ; pars poplite secto
416 mortis ad invidiam vivit, partemque cerebri
417 hic galeae cum parte rapit, fortique lacerto
418 disicit ancipiti miserabile sinciput ense.
419 Ut primum versis dat tergum Vandalus armis,
420 succedit caedes pugnae : discrimine nullo
421 sternuntur passim campis, et fortia quaeque
422 fecit iners. Trepidante fuga mare pallidus intrat
423 et naves pertransit eques, turpique natatu
424 de pelago ad cymbam rediit. Sic tertia Pyrrhi
425 quondam pugna fuit : caesis cum milibus illum
426 Dentatus premeret, lacerae vix fragmina classis
427 traxit in Epirum, qui Chaonas atque Molossos,
428 qui Thracum Macetumque manus per litora vestra
429 sparserat et cujus vires Oenotria pallens
430 ipsaque, quae petiit, trepidaverat uncta Tarentus.
431 Hostibus expulsis campum, qui maximus exstat,
432 jam lustrare vacat ; videas hic strage sub illa
433 utrorumque animos : nullus non pectore caesus,
434 quisquis vester erat ; nullus non terga foratus,
435 illorum quisquis. Clamant hoc vulnera primi
436 praedonum tum forte ducis, cui regis avari
437 narratur nupsisse soror, qui pulvere caeco
438 clausus et elisus pilis vestigia turpis
439 gestat adhuc probrosa fugae. Sic agmina vestra
440 cum spoliis campum retinent et Marte fruuntur.
441 Interea duplici taxis dum litore classem
442 inferno superoque mari, cadit omnis in aequor
443 silva tibi nimiumque diu per utrumque recisus,
444 Appennine, latus, navali qui arbore dives
445 non minus in pelagus nemorum quam mittis aquarum.
446 Gallia continuis quamquam sit lassa tributis,
447 hoc censu placuisse cupit nec pondera sentit
448 quae prodesse probat. Non tantis major Atrides
449 Carpathium texit ratibus, cum Doricus hostis
450 Sigeas rapturus opes Rhoeteia clausit
451 Pergama ; nec tantae Seston juncturus Abydo
452 Xerxes classis erat, tumidas cum sterneret undas
453 et pontum sub ponte daret, cum stagna superbo
454 irrupit temerata gradu turmaeque frequentes
455 Hellespontiaco persultavere profundo.
456 Non sic Leucadio classis Mareotica portu
457 Actiacas abscondit aquas, in bella mariti
458 dum venit a Phario dotalis turba Canopo,
459 cum patrio Cleopatra ferox circumdata sistro
460 milite vel piceo fulvas onerata carinas
461 Dorida diffusam premeret Ptolomaide gaza.
462 Hoc tu non cultu pugnans, sed more priorum
463 dite magis ferro, merito cui subjacet aurum
464 divitis ignavi. Tales ne sperne rebelles :
465 etsi non acies, decorant tamen ista triumphos.
466 Nec me Lageam stirpem memorasse pigebit
467 hostis ad exemplum vestri ; namque auguror isdem
468 regnis fortunam similem, cum luxus in illa
469 parte sit aequalis nec pejor Caesar in ista.
470 Ilicet aggrederis quod nullus tempore nostro

471 Augustus potuit : rigidum septemplex Histri
472 agmen in arma rapis. Nam quidquid languidus axis
473 cardine Sithonio sub Parrhase parturit Ursa,
474 hoc totum tua signa pavet ; Bastarna, Suebus,
475 Pannonius, Neurus, Chunus, Geta, Dacus, Halanus,
476 Bellonotus, Rugus, Burgundio, Vesus, Alites,
477 Bisalta, Ostrogothus, Procrustes, Sarmata, Moschus
478 post aquilas venere tuas ; tibi militat omnis
479 Causacus et Scythicae potor Tanaiticus undae.
480 Quid faciat fortuna viri ? Quascumque minatur,
481 has tremuit jam Roma manus ; modo principe sub te,
482 ne metuat, prope parva putat, nisi serviat illi
483 quod timuit regnante alio. Jam castra movebas
484 et te diversis stipabant milia signis,
485 obsequium gens una negat, quae nuper ab Histro
486 rettulit indomitum solito truculentior agmen,
487 quod dominis per bella caret, populoque superbo
488 Tuldila plectendas in proelia suggerit iras.
489 Hic tu vix armis positus iterum arma retractas :
490 Bistonides veluti Ciconum cum forte pruinas
491 Ogygiis complent thiasis, seu Strymonos arvis
492 seu se per Rhodopen seu qua nimbosus in aequor
493 volvit Hyperboreis in cautibus Hismarus Hebrum
494 dat somno vaga turba, simul lassata quiescunt
495 orgia et ad biforem reboat nec tibia flatum.
496 Vix requies ; jam fronde ligant rotat enthea thyrsum
497 Bassaris et maculis Erythraeae nebridos horrens
498 excitat Odrysios ad marcida tympana mystas.
499 Tu tamen hanc differs poenam, sed sanguinis auctor
500 majoris, dum parcis, eras. Non pertulit ultra
501 hoc pro te plus cauta manus vestrumque pudorem
502 sprexit pro vobis ; primi cadit hostia belli
503 quisque rebellis erat. Praedam quoque dividis illis,
504 mens devota quibus fuerat ; quae territa servit
505 exemplo, gaudet pretio. Pharsalica Caesar
506 arva petens subitas ferro compescuit iras ;
507 sed sua membra secans, ut causae mole coactus,
508 flevit quos feriit. Vestris haec proficit armis
509 seditio ; quodcumque jubes, nisi barbarus audit,
510 hic cadit, ut miles timeat. Jam tempore brumae
511 Alpes marmoreas atque occurrentia juncto
512 saxa polo rupesque vitri siccamque minantes
513 per scopulos pluviam primus pede carpis et idem
514 lubrica praemisso firmas vestigia conto.
515 Coeperat ad rupis medium quae maxima turba est
516 interno squalere gelu, quod colle supino
517 artatis conclusa viis reptare rigenti
518 non poterat revoluta solo. Fors unus ab illo
519 agmine, canentem cujus rota triverat Histrum,
520 exclamat : "Gladios malo et sollemne quieta
521 quod frigus de morte venit ; mea torpor inertii
522 membra rigore ligat ; quodam mihi corpus adustum
523 frigoris igne perit. Sequimur sine fine labori
524 instantem juvenem ; quisquis fortissimus ille est
525 aut rex aut populus castris modo clausus aprica
526 vel sub pelle jacet ; nos anni vertimus usum.
527 Quod jubet hic lex rebus erit ; non flectitur umquam
528 a coeptis damnumque putat, si temporis iras

529 vel per damna timet. Qua dicam gente creatum,
530 quem Scythia non patior ? Cujus lac tigridis infans
531 Hyrcana sub rupe bibit ? quae sustulit istum
532 axe meo gravior tellus ? en vertice summo
533 argentes cogit turmas ac frigora ridet,
534 dum solus plus mente calet. Cum classica regis
535 Arctoi sequerer, Romani principis arma
536 Caesareumque larem luxu torpere perenni
537 audieram ; dominos nil prodest isse priores,
538 si rex hic quoque fortis erat." Majora parantem
539 dicere de scopulo verbis accendis amaris :
540 "Quisquis es, oppositi metuis qui lubrica clivi,
541 frange cutem pendentis aquae scalptoque fluento
542 sit tibi lympha gradus. Turpes depone querelas :
543 otia frigus habent. Numquid mihi membra biformis
544 Hylaei natura dedit ? num Pegasus alis
545 adjuvit, quidquid gradior, pennasque volanti
546 dat Calais Zetusque mihi, quem ninguida cernis
547 calcantem jam dorsa jugi ? Vos frigora frangunt,
548 vos Alpes ? Jam jam studeam pensare pruinas :
549 aestatem sub Syrte dabo." Sic agmina voce
550 erigis exemploque levas primusque labores
551 aggredieris, quoscumque jubes ; tum cetera paret
552 turba libens, servit propriis cum legibus auctor.
553 Qui tibi praeterea comites quantusque magister
554 militiae, vestrum post vos qui compulit agmen,
555 sed non invitum ! dignus cui cederet uni
556 Sulla acie, genio Fabius, pietate Metellus,
557 Appius eloquio, vi Fulvius, arte Camillus.
558 Si praefecturae quantus moderetur honorem
559 vir quaeras, tendit patulos qua Gallia fines,
560 vix habuit mores similes cui teste senatu
561 in se etiam tractum commiserat Ulpus ensem.
562 Qui dictat modo jura Getis, sub iudice vestro
563 pellitus ravum praeconem suspicit hospes.
564 Quid loquar hic illum qui scrinia sacra gubernat,
565 qui, cum civilis dispenset partis habenas,
566 sustinet armati curas, interprete sub quo
567 flectitur ad vestra gens efferat condiciones ?
568 Quid laudare Petrum parvis, temeraria Clio,
569 viribus aggredieris ? Cujus dignatur ab ore
570 Caesar in orbe loqui, licet et quaestore disertum
571 polleat ; attamen hic nuper, placidissime princeps,
572 obside percepto nostrae de moenibus urbis
573 visceribus miseris insertum depulit ensem.
574 Et quia lassatis nimium spes unica rebus
575 venisti, nostris, petimus, succurre ruinis
576 Lugdunumque tuam, dum praeteris, aspice victor.
577 Otia post nimios poscit te fracta labores ;
578 cui pacem das, redde animum : lassata juveni
579 cervix deposito melius post sulcat aratro
580 telluris glaebam solidae. Bove, fruge, colono,
581 civibus exhausta est. Stantis fortuna latebat ;
582 dum capitur, vae quanta fuit ! Post gaudia, princeps,
583 delectat meminisse mali. Populatibus, igni
584 etsi concidimus, veniens tamen omnia tecum
585 restituis : fuimus vestri quia causa triumphum,
586 ipsa ruina placet. Cum victor scandere curram

587 incipies crinemque sacrum tibi more proprium
 588 nectet muralis, vallaris, civica laurus
 589 et regum aspicient Capitolia fulva catenas,
 590 cum vesties Romam spoliis, cum divite cera
 591 pinges Cinyphii captiva mapalia Bocchi,
 592 ipse per obstantes populos raucosque fragores
 593 praecedam et tenui, sicut nunc, carmine dicam
 594 te geminas Alpes, Syrtes te, te mare magnum,
 595 te freta, te Libycas pariter domuisse catervas,
 596 ante tamen vicisse mihi. Quod lumina flectis
 597 quodque serenato miseros jam respicis ore,
 598 exsultare libet : memini, cum parcere velles,
 599 hic tibi vultus erat ; mitis dat signa venustas.
 600 Annue, sic vestris respiret Byrsa tropaeis,
 601 sic Parthus certum fugiat Maurusque timore
 602 albus eat ; sic Susa tremant positisque pharetris
 603 exarmata tuum circumstent Bactra tribunal.

PRAEFATIO PANEGYRICI DICTI AVITO AUGUSTO

S6 v.1 Pallados armisonae festum dum cantibus ortum
 2 personat Hismario Thracia vate chelys,
 3 et dum Mopsopium stipantur per Marathonem
 4 qui steterant fluvii quaeque cucurrit humus,
 5 dulcisonum quatitur fidibus dum pectine murmur,
 6 has perhibent laudes laude probasse deam :
 7 "Diva, Gigantei fudit quam tempore belli
 8 armatus partus vertice dividuo,
 9 quam neque Deliacis peperit Latona sub antris,
 10 fixura errantem Cyclada pignoribus,
 11 nec quae Cadmeis pariens Alciden in oris
 12 suspendit triplici nocte puerperium,
 13 nec cujus pluvio turris madefacta metallo est,
 14 cum matrem impleret filius aurigena.
 15 Sed te, cum trepidum spectaret Phlegra Tonantem,
 16 impulit excussam vertice ruptus apex ;
 17 cumque deos solae traherent in proelia vires,
 18 confusum valde te sine robur erat ;
 19 protulit ut mox te patrius, Sapiencia, vertex,
 20 tum mage vicerunt, te cum habuere dei.
 21 Te propter cessit, manibus constructa tremendis,
 22 jam prope per rutilum machina tensa polum.
 23 Pindus, Othrys, Pholoe dextris cecidere Gigantum,
 24 decidit et Rhoeti jam gravis Ossa manu.
 25 Sternitur Aegaeon, Briareus, Ephialta Mimasque,
 26 Arctos sueti lambere calce rotas.
 27 Enceladus patri jacuit fratrique Typhoeus ;
 28 Euboicam hic rupem sustinet, hic Siculam."
 29 Hinc sese ad totam genetricem transtulit Orpheus
 30 et docuit chordas dicere Calliopam.
 31 Assurrexerunt Musae sub laude sororis
 32 et placuit divae carmine plus pietas.
 33 Quod si maternas laudes cantasse favori est
 34 nec valeo priscas aequiperare fides ;
 35 publicus hic pater est, vovi cui carmen, Avitus ;

36 materia est major si mihi Musa minor.

PANEGYRICUS

S7 v.1 Phoebe, peragrato tandem visurus in orbe
 2 quem possis perferre parem, da lumina caelo :
 3 sufficit hic terris. Nec se jam signifer astris
 4 jactet, Marmaricus quem vertice conterit Atlans :
 5 sidera sunt isti. Quae sicut mersa nitescunt,
 6 adversis sic Roma micat, cui fixus ab ortu
 7 ordo fuit crevisse malis. Modo principe surgit
 8 consule ; nempe, patres, collatos cernere fasces
 9 vos juvat et sociam sceptris mandasse curulem :
 10 credite, plus dabitur : currus. Jam nocte bifrontes,
 11 anceps Jane, comas duplicique accingere lauro.
 12 Principis anterior, jam consulis iste coruscat
 13 annus, et emerita trabeis diademata crescunt.
 14 Incassum jam, Musa, paves, quod propulit Auster
 15 vela ratis nostrae ; pelago quia currere famae
 16 coepimus, en sidus, quod nos per caerula servet.
 17 Forte pater superum prospexit ab aethere terras :
 18 ecce viget quodcumque videt ; mundum reparasse
 19 aspexisse fuit ; solus fovet omnia nutus.
 20 Jamque ut convenient superi, Tegeaticus ales
 21 nunc plantis, nunc fronte volat ; vix contigit arva
 22 et toto descendit avo, mare, terra vel aer
 23 indigenas misere deos. Germane Tonantis,
 24 prime venis, viridi qui Dorida findere curru
 25 suetus in attonita spargis cito terga serenum ;
 26 umentes Nymphas Phorcus comitatur ibique
 27 glaucus, Glauce, venis, vatium et certissime Proteu,
 28 certus eras. Longo veniunt post ordine divi :
 29 pampineus Liber, Mars trux, Tiryntius hirtus,
 30 nuda Venus, fecunda Ceres, pharetrata Diana,
 31 Juno gravis, prudens Pallas, turrita Cybele,
 32 Saturnus profugus, vaga Cynthia, Phoebus ephebus,
 33 Pan pavidus, Fauni rigidi, Satyri petulantes.
 34 Convenere etiam caelum virtute tenentes :
 35 Castor equo, Pollux caestu, Perseus harpe,
 36 fulmine Vulcanus, Tiphys rate, gente Quirinus.
 37 Quis canat hic aulam caeli, rutilantia cujus
 38 ipsa pavementum sunt sidera ? Jam pater aureo
 39 tranquillius sese solio locat ; inde priores
 40 consedere dei (fluviis quoque contigit illo,
 41 sed senibus, residere loco, tibi, maxime fluctu
 42 Eridane et flavis in pocula fracte Sygambris,
 43 Rhene tumens, Scythiaequae vagis equitate catervis
 44 Hister et ignotum plus notus, Nile, per ortum),
 45 cum procul erecta caeli de parte trahebat
 46 pigros Roma gradus, curvato cernua collo
 47 ora ferens ; pendent crines de vertice, tecti
 48 pulvere non galea, clipeusque impingitur aegris
 49 gressibus, et pondus, non terror, fertur in hasta.
 50 Utque pii genibus primum est adfusa Tonantis,
 51 " Testor, sancte parens", inquit, "te, numen et illud
 52 quidquid Roma fui, summo satis obruta fato
 53 invideo abjectis : pondus non sustinet ampli
 54 culminis arta domus nec fulmen vallibus instat.

55 Quid, rogo, bis seno mihi vulture Tuscus haruspex
 56 portendit ? Jaciens primae cur moenia genti
 57 ominibus jam celsa fui, dum collis Etrusci
 58 fundamenta jugis aperis mihi, Romule pauper ?
 59 Plus gladio secura fui cum turbine juncto
 60 me Rutulus, Veiens pariterque Auruncus et Aequus,
 61 Hernicus et Volscus premerent. Sat magna videbar
 62 et tibi dum rumpit vitiatum femina ferro
 63 corpus et ad castum remeas, pudor erute, vulnus ;
 64 jam cum vallatam socio me clausit Etrusco
 65 Tarquinius : pro Muci ignes ! Pro Coclitis undae !
 66 Pro dolor ! hic quonam est qui sub me jura redegit
 67 Samnitum Gurges ? Volsci quid terga cecidit
 68 Marcius, et Senones fundens dictator et exul ?
 69 Fabricii vitam vellem, mortes Deciorum,
 70 vel sic vincentem vel sic victos : mea redde
 71 principia. Heu ! quo nunc pompae ditesque triumpho
 72 et pauper consul ? Libycum mea terruit axem
 73 cuspis et infido posui juga tertia Poeno.
 74 Indorum Ganges, Colchorum Phasis, Araxes
 75 Armeniae, Ger Aethiopum Tanaisque Getarum
 76 Thybrinum tremuere meum. Me Teutone juncto
 77 quondam fracte subis Cimber, gladiisque gravatas
 78 ante manus solas jussi portare catenas.
 79 Vae mihi ! qualis eram, cum per mea jussa juberent
 80 Sulla, Asiatogenes, Curius, Paulus, Pompeius
 81 Tigrani, Antiocho, Pyrrho, Persae, Mithridati
 82 pacem ac regna, fugam, vectigal, vincla, venenum.
 83 Sauromatem taceo ac Moschum solitosque cruentum
 84 lac potare Getas ac pocula tingere venis
 85 vel, cum diffugiunt, fugiendos tum mage Persas.
 86 Nec terras dixisse sat est : fulgentibus armis
 87 tot maria intravi duce te longeque remotas
 88 sole sub occiduo gentes. Victricia Caesar
 89 signa Caledonios transvexit ad usque Britannos ;
 90 fuderit et quamquam Scotum et cum Saxone Pictum,
 91 hostes quaesivit, quem jam natura vetabat
 92 quaerere plus homines. Vidit te frangere Leucas,
 93 trux Auguste, Pharon, dum classicus Actia miles
 94 stagna quatit profugisque bibax Antonius armis
 95 incestam vacuat patrio Ptolomaida regno.
 96 Cumque prius stricto quereretur de cardine mundi,
 97 nec limes nunc ipsa mihi. Plus, summe deorum,
 98 sum justo tibi visa potens quod Parthicus ultro
 99 restituit mea signa Sapor positoque tiara
 100 funera Crassorum flevit, dum purgat. Et hinc jam
 101 (pro dolor !) excusso populi jure atque senatus
 102 quod timui incurri : sum tota in principe, tota
 103 principis, et fio lacerum de Caesare regnum,
 104 quae quondam regina fui ; Capreasque Tiberi
 105 et caligas Gaii Claudii censura secuta est
 106 et vir morte Nero ; tristi Pisone verendum
 107 Galbam sternis, Otho, speculo qui pulcher haberi
 108 dum captas, ego turpis eram ; mihi foeda Vitelli
 109 intulit ingluvies ventrem, qui tempore parvo
 110 regnans sero perit ; lassam post inclitus armis
 111 Vespasianus habet, Titus hinc, post hunc quoque frater ;
 112 post quem tranquillius vix me mihi reddere Nerva

113 coepit, adoptivo factus de Caesare major ;
114 Ulpus inde venit, quo formidata Sygambris
115 Agrippina fuit, fortis, pius, integer, acer.
116 Talem capta precor. Trajanum nescio si quis
117 aequiperet, ni fors iterum tu, Gallia, mittas
118 qui vincat." Lacrimae vocem clausere precantis,
119 et quidquid superest luctus rogat. Undique caeli
120 assurgunt proceres, Mars, Cypris, Romulus et qui
121 auctores tibi, Roma, dei ; jam mitior ipsa
122 flectitur atque iras veteres Saturnia donat.
123 Juppiter ista refert : "Fatum, quo cuncta reguntur
124 quoque ego, non licuit frangi ; sat celsa laborant
125 semper, et elatas nostro de munere vires
126 invidit Fortuna sibi ; sed concipe magnos,
127 quamquam fracta, animos. Si te Porsenna soluto
128 plus timuit de ponte fremens, si moenia capta
129 mox Brenni videre fugam, si denique dirum
130 Hannibalem juncto terrae caelique tumultu
131 reppulimus (cum castra tuis jam proxima muris
132 starent, Collina fulmen pro turre cucurrit,
133 atque illic iterum timuit natura paventem
134 post Phlegram pugnare Jovem), torpentia tolle
135 lumina, detersam mentem caligo relinquat.
136 Te mirum est vinci ; incipies cum vincere, mirum
137 non erit ; utque tibi pateat quo surgere tandem
138 fessa modo possis, paucis, cognosce, docebo.
139 "Est mihi, quae Latio se sanguine tollit alumnam,
140 tellus clara viris, cui non dedit optima quondam
141 rerum opifex natura parem ; fecundus ab urbe
142 pollet ager, primo qui vix proscissus aratro
143 semina tarda sitit vel luxuriante juvenco
144 arcana exponit piceam pinguedine glaebam.
145 Assurrexit huic, coxit quod torridus Auster,
146 Niliacum Libycumque solum, collataque semper
147 arida Mygdoniae damnarunt Gargara falces ;
148 Apulus et Calaber cessit. Spes unica rerum,
149 hanc, Arverne, colens nulli pede cedis in armis,
150 quosvis vincis equo. Testis mihi Caesaris esto
151 hic nimium Fortuna pavens, cum colle repulsus
152 Gergoviae castris miles vix restitit ipsis.
153 Hos ego tam fortes volui, sed cedere Avitum
154 dum tibi, Roma, paro, rutilat cui maxima dudum
155 stemmata complexum germen, palmata cucurrit
156 per proavos, gentisque suae te teste, Philagri,
157 patricius resplendet apex. Sed portio quanta est
158 haec laudum, laudare patres, quos quippe curules
159 et praefecturas constat debere nepoti ?
160 Sint alii, per quos se postuma jactet origo,
161 et priscum titulis numeret genus alter ; Avite,
162 nobilitas tu solus avos. Libet edere tanti
163 gesta viri et primam paucis percurrere vitam.
164 Solverat in partum generosa puerpera casti
165 ventris onus ; manifesta dedi mox signa futuri
166 principis ac totam fausto trepidi patris aulam
167 implevi augurio ; licet idem grandia nati
168 culparet fata et pueri jam regna videret,
169 sed sibi commissum tanto sub pignore cernens
170 mundi depositum, ne quid, Roma, periret,

171 juvit fortunam studio. Lactantia primum
172 membra dedit nivibus, glaciemque inrumpere plantis
173 jussit et attritas parvum ridere pruinas.
174 Surgentes animi Musis formantur et illo
175 quo Cicerone tonas ; didicit quoque facta tuorum
176 ante ducum ; didicit pugnas libroque relegit
177 quae gereret campo. Primus vix coeperat esse
178 ex infante puer, rabidam cum forte cruentis
179 rictibus atque escas jejuna fauce parantem
180 plus catulis stravit (fuerant nam fragmina propter)
181 arrepta de caute lupam, fractusque molari
182 dissiluit vertex et saxum vulnere sedit.
183 Sic meus Alcides, Nemeae dum saltibus errat,
184 occurrit monstro vacuus, non robora portans,
185 non pharetras ; stetit ira fremens atque hoste propinquo
186 consuluit solos virtus decepta lacertos.
187 "Parva quidem, dicenda tamen : quis promptior isto
188 tensa catenati summittere colla Molossi
189 et lustris recubare feras interprete nare
190 discere non visas et in aere quaerere plantas ?
191 Jam si forte suem latratibus improbus Umber
192 terruit, albentes nigro sub gutture lunas
193 frangere ludus erat colluctantique lacerto
194 vasta per adversas venabula cogere praedas.
195 Quam pulchrum, cum forte domum post lustra revertens
196 horrore splenderet apri virtusque repugnans
197 proderet invitum per fortia facta pudorem !
198 Sic Pandioniis castae Tritonidos arvis
199 Hippolytus roseo sudum radiabat ab ore,
200 sed simul a gemino flagrans cum Cressa furore
201 transiit adfectu matres et fraude novercas.
202 Quid volucrum studium, dat quas natura rapaces
203 in vulgus prope cognatum ? Quis doctior isto
204 instituit varias per nubila jungere lites ?
205 Alite vincit aves, celerique per aethera plausu
206 hoc nulli melius pugnator militat unguis.
207 "Nec minus haec inter civilia jura secutus
208 eligitur primus, juvenis, solus, mala fractae
209 alliget ut patriae poscatque informe recidi
210 vectigal. Procerum tum forte potentior illic,
211 post etiam princeps, Constantius omnia praestat,
212 indole defixus tanta et miratus in annis
213 parvis grande bonum vel in ore precantis ephēbi
214 verba senis. Ducis hinc pugnas et foedera regum
215 pandere, Roma, libet. Variis incussa procellis
216 bellorum regi Getico tua Gallia pacis
217 pignore jussa dare est, inter quae nobilis obses
218 tu, Theodore, venis ; quem pro pietate propinqui
219 expetis in media pelliti principis aula
220 tutus, Avite, fide. Probat hoc jam Theudoris altum
221 exemplum officii. Res mira et digna relatu,
222 quod fueris blandus, regi placuisse feroci.
223 Hinc te paulatim praelibat sensibus imis
224 atque animis vult esse suum ; sed spernis amicum
225 plus quam Romanum gerere. Stupet ille repulsam
226 et plus inde places. Rigidum sic, Pyrrhe, videbas
227 Fabricium, ingestas animo cum divite fugit
228 pauper opes, regem temnens, dum supplice censu

229 pignus amicitiae vili mendicat ab auro.
 230 Aetium interea, Scythico quia saepe duello est
 231 edoctus, sequeris ; qui, quamquam celsus in armis,
 232 nil sine te gessit, cum plurima tute sine illo.
 233 Nam post Juthungos et Norica bella subacto
 234 victor Vindelico Belgam, Burgundio quem trux
 235 presserat, absolvit junctus tibi. Vincitur illic
 236 cursu Herulus, Chonus jaculis Francusque natatu,
 237 Sauromato clipeo, Salius pede, falce Gelonus,
 238 vulnere vel si quis plangit cui flesse feriri est
 239 ac ferro perarasse genas vultuque minaci
 240 rubra cicatricum vestigia defodisse.
 241 Illustri jam tum donatur celsus honore.
 242 Squameus et rutilis etiamnunc livida cristis
 243 ora gerens, vix arma domum sordentia castris
 244 rettulerat, nova bella iterum pugnamque sub ipsis
 245 jam patriae muris perjurus commovet hostis.
 246 Litorius Scythicos equites tum forte subacto
 247 celsus Aremorico Geticum rapiebat in agmen
 248 per terras, Arverne, tuas ; qui proxima quaeque
 249 discursu, flammis, ferro, feritate, rapinis
 250 debebant, pacis fallentes nomen inane.
 251 Hujus tum famulum quidam truculentior horum,
 252 mox feriente, feris ; ruit ille et tristia fata
 253 commendat domino absentem partemque futuram
 254 vindictae moriens Stygium spe portat ad amnem.
 255 Et jam fama viro turres portasque tuenti
 256 intuitu pavidae plebes perfert scelus actum.
 257 Excutitur, restat, pallet, rubet, alget et ardet,
 258 ac sibimet multas vultum variata per unum
 259 ira facit facies vel (qui mos saepe dolenti)
 260 plus amat extinctum. Tandem prorumpit et "arma,
 261 arma" fremit, pinguisque etiamnum sanguine fertur
 262 lorica, obtusus per barbara vulnera contus
 263 atque sub assiduis dentatus caedibus ensis.
 264 Includit suras ocreis capitique micantem
 265 imponit galeam, fulvus cui crescit in altum
 266 conus et iratam jaculatur vertice lucem.
 267 Et jam scandit equum vulsisque a cardine portis
 268 emicat ; adsistunt socio Virtusque Dolorque
 269 et Pudor : armatas pilo petit impiger alas
 270 pugando pugnam quaerens, pavidumque per agmen
 271 multorum interitu compensat quod latet unus.
 272 Sic Phrygium Emathia victorem cuspide poscens
 273 Aeacides caeso luctum frenavit amico
 274 per mortes tot, Troja, tuas, jam vilia prae se
 275 agmina contentus ruere strictumque per amplos
 276 exserere gladium populos ; natat obruta tellus
 277 sanguine, dumque hebetat turba grave caedua telum
 278 absens in cuncto sibi vulnere jam cadit Hector.
 279 Proditus ut tandem tanti qui causa tumultus,
 280 inquit Avitus : "Age, Scythica nutrite sub Arcto,
 281 qui furis et caeco tantum qui fidis inermi,
 282 congregere armato. Multum tibi praestitit ira
 283 jam mea : concessi pugnam jubeoque resistas ;
 284 certantem mactasse juvat." Sic fatur et aequor
 285 prosilit in medium, nec non ferus advenit hostis.
 286 Ut primum pectus vel comminus ora tulere,

287 hic ira tremit, ille metu. Jam cetera turba
 288 diversis trepidat votis variosque per ictus
 289 pendet ab eventu. Sed postquam prima, secunda
 290 tertiaque acta rota est, venit ecce et celsa cruentum
 291 perforat hasta virum, post et confinia dorsi
 292 cedit transfosso ruptus bis pectore thorax.
 293 Et dum per duplicem sanguis singultat hiatum,
 294 dividua ancipitem carpserunt vulnera vitam.
 295 "Haec post gesta viri (temet, Styx livida, testor)
 296 intemerata mihi praefectus jura regebat ;
 297 et caput hoc sibimet solitis defessa ruinis
 298 Gallia suscipiens Getica pallebat ab ira.
 299 Nil prece, nil pretio, nil milite fractus agebat
 300 Aetius ; capto terrarum damna patebant
 301 Litorio ; in Rhodanum proprios producere fines
 302 Theudoridae fixum, nec erat pugnare necesse,
 303 sed migrare Getis. Rabidam trux asperat iram
 304 victor ; quod sensit Scythicum pro moenibus hostem
 305 imputat, et nil est gravius, si forsitan umquam
 306 vincere contingat, trepido. Postquam undique nullum
 307 praesidium ducibusque tuis nil, Roma, relictum est,
 308 foedus, Avite, novas ; saevum tua pagina regem
 309 lecta domat ; jussisse sat est te quod rogat orbis.
 310 Credent hoc umquam gentes populique futuri ?
 311 Littera Romani cassat quod, barbare, vincis.
 312 Jura igitur rexit ; namque hoc quoque par fuit, ut tum
 313 assertor fieret legum qui nunc erit auctor,
 314 ne dandus populis princeps, caput, induperator,
 315 Caesar et Augustus solum fera proelia nosset.
 316 "Jam praefecturae perfunctus culmine tandem
 317 se dederat ruri (numquam tamen otia, numquam
 318 desidia imbellis ; studiumque et cura quieto
 319 armorum semper), subito cum rupta tumultu
 320 barbaries totas in te transfuderat Arctos,
 321 Gallia. Pugnacem Rugum comitante Gelono
 322 Gepida trux sequitur ; Scirum Burgundio cogit ;
 323 Chonus, Bellonotus, Neurus, Bastarna, Toringus,
 324 Bructerus, ulvosa vel quem Nicer alluit unda
 325 prorumpit Francus ; cecidit cito secta bipenni
 326 Hercynia in lintres et Rhenum texuit alno ;
 327 et jam terrificis diffuderat Attila turmis
 328 in campos se, Belga, tuos. Vix liquerat Alpes
 329 Aetius, tenue et rarum sine milite ducens
 330 robur in auxiliis, Geticum male credulus agmen
 331 incassum propriis praesumens adfore castris.
 332 Nuntius at postquam ductorem perculit, Hunos
 333 jam prope contemptum propriis in sedibus hostem
 334 expectare Getas, versat vagus omnia secum
 335 consilia et mentem curarum fluctibus urget.
 336 Tandem nutanti sedit sententia celsum
 337 exorare virum, collectisque omnibus una
 338 principibus coram supplex sic talibus inquit :
 339 "Orbis, Avite, salus, cui non nova Gloria nunc est
 340 quod rogat Aetius ; voluisti, et non nocet hostis ;
 341 vis ? prodest. Inclusa tenes tot milia nutu,
 342 et populis Geticis sola est tua gratia limes ;
 343 infensi semper nobis pacem tibi praestant.
 344 Victrices, i, prome aquilas ; fac, optime, Chunos,

345 quorum forte prior fuga nos concusserat olim,
 346 bis victos prodesse mihi." Sic fertur, et ille
 347 pollicitus votum fecit spem. Protinus inde
 348 avolat et famulas in proelia concitat iras.
 349 Ibant pellitae post classica Romula turmae,
 350 ad nomen currente Geta ; timet aere vocari
 351 dirutus, opprobrium, non damnum barbarus horrens.
 352 Hos ad bella trahit jam tum spes orbis Avitus,
 353 vel jam privatus vel adhuc. Sic cinnama busto
 354 collis Erythraei portans Phoebieus ales
 355 concitat omne avium vulgus ; famulantia currunt
 356 agmina, et angustus pennas non explicat aer.
 357 Jam prope fata tui bis senas vulturis alas
 358 complebant (scis namque tuos, scis, Roma, labores) :
 359 Aetium Placidus mactavit semivir amens ;
 360 vixque tuo impositum capiti diadema, Petroni,
 361 ilico barbaries, nec non sibi capta videri
 362 Roma Getis tellusque suo cessura furori.
 363 Raptores ceu forte lupi, quis nare sagaci
 364 monstrat odor pinguem clausis ab ovilibus auram,
 365 irritant acuuntque famem portantque rapinae
 366 in vultu speciem, patulo jejunia rictu
 367 fallentes ; jam jamque tener spe frangitur agnus
 368 atque absens avido crepitat jam praeda palato.
 369 Quin et Aremoricus piratam Saxona tractus
 370 sperabat, cui pelle salum sulcare Britannum
 371 ludus et assuto glaucum mare findere lembo.
 372 Francus Germanum primum Belgamque secundum
 373 sternebat, Rhenumque, ferox Alamanne, bibebas
 374 Romani ripis et utroque superbus in agro
 375 vel civis vel victor eras. Sed perdita cernens
 376 terrarum spatia princeps jam Maximus, unum
 377 quod fuit in rebus, peditumque equitumque magistrum
 378 te sibi, Avite, legit. Collati rumor honoris
 379 invenit agricolam, flexi dum forte ligonis
 380 exercet dentes vel pando pronus aratro
 381 vertit inexcocctam per pingua jugera glaebam.
 382 Sic quondam ad patriae res fractas pauper arator,
 383 Cincinnate, venis, veterem cum te induit uxor
 384 ante boves trabeam dictatoremque salignae
 385 excepere fores atque ad sua tecta ferentem
 386 quod non persevit, turpique e fasce gravata
 387 vile triumphalis portavit purpura semen.
 388 Ut primum ingesti pondus suscepit honoris,
 389 legas qui veniam poscant, Alamanne, furori,
 390 Saxonis incursus cessat, Chattumque palustri
 391 alligat Albis aqua ; vixque hoc ter menstrua totum
 392 luna videt, jamque ad populos ac rura feroci
 393 tenta Getae pertendit iter, qua pulsus ab aestu
 394 Oceanus refluxum spargit per culta Garumnam ;
 395 in flumen currente mari transcendit amarus
 396 blanda fluenta latex, fluviique impacta per alveum
 397 salsa peregrinum sibi navigat unda profundum.
 398 Hic jam disposito laxantes frena duello
 399 Vesorum proceres raptim suspendit ab ira
 400 rumor, succinctum referens diplomate Avitum
 401 jam Geticas intrare domos positaque parumper
 402 mole magisterii legati jura subisse.

403 Obstupuere duces pariter Scythicusque senatus
 404 et timuere suam pacem ne forte negaret.
 405 Sic rutilus Phaethonta levem cum carperet axis,
 406 jam pallente die flagrantique excita mundo
 407 pax elementorum fureret vel sicca propinquus
 408 saeviret per stagna vapor limusque sitiret
 409 pulvereo ponti fundo, tunc unica Phoebi
 410 insuetum clemens exstinxit flamma calorem.
 411 "Hic aliquis tum forte Getes, dum falce recocta
 412 ictibus informat saxoque cacuminat ensem,
 413 jam promptus caluisse tubis, jam jamque frequenti
 414 caede sepulturus terram non hoste sepulto,
 415 claruit ut primum nomen venientis Aviti,
 416 exclamat : "Periit bellum, date rursus aratra.
 417 Otia si replico priscae bene nota quietis,
 418 non semel iste mihi ferrum tulit. O pudor ! o di !
 419 tantum posse fidem ! Quid foedera lenta minaris,
 420 in damnum mihi fide meum ? Compendia pacis
 421 et praestare jubes nos et debere. Quis umquam
 422 crederet ? En Getici reges, parere volentes,
 423 inferius regnasse putant. Nec dicere saltim
 424 desidiae obtentu possum te proelia nolle :
 425 pacem fortis amas. Jam partes sternit Avitus ;
 426 insuper et Geticas praemissus continet iras
 427 Messianus ; adhuc mandasti, et ponimus arma.
 428 Quid restat quod posse velis ? Quod non sumus hostes,
 429 parva reor ; prisco tu si mihi notus in actu es,
 430 auxiliaris ero vel sic pugnare licebit."
 431 "Haec secum rigido Vesius dum corde volutat,
 432 ventum in conspectum fuerat. Rex atque magister
 433 propter constiterant ; hic vultu erectus, at ille
 434 laetitia erubuit veniamque rubore poposcit.
 435 Post hinc germano regis, hinc rege retento
 436 Palladium implicitis manibus subiere Tolosam.
 437 Haud secus insertis ad pulvinaria palmis
 438 Romulus et Tatius foedus jecere, parentum
 439 cum ferro et rabidis cognato in Marte maritis
 440 Hersilia inseruit Pallantis colle Sabinas.
 441 Interea incautam furtivis Vandalus armis
 442 te capit, infidoque tibi Burgundio ductu
 443 extorquet trepidas mactandi principis iras.
 444 Heu facinus ! In bella iterum quartosque labores
 445 perfida Elisseae crudescunt classica Byrsae.
 446 Nutristis quod, fata, malum ? Conscenderat arces
 447 Evandri Massyla phalanx montesque Quirini
 448 Marmarici pressere pedes rursusque revexit
 449 quae captiva dedit quondam stipendia Barce.
 450 Exsilium patrum, plebis mala, principe caeso
 451 captivum imperium ad Geticas rumor tulit aures.
 452 Luce nova veterum coetus de more Getarum
 453 contrahitur ; stat prisca annis viridisque senectus
 454 consiliis ; squalent vestes ac sordida macro
 455 lintea pinguescunt tergo, nec tangere possunt
 456 altatae suram pelles, ac poplite nudo
 457 peronem pauper nodus suspendit equinum.
 458 Postquam in consilium seniorum venit honora
 459 pauperies pacisque simul rex verba poposcit,
 460 dux ait : "Optassem patriis securus in arvis

461 emeritam, fateor, semper fovisse quietem,
 462 ex quo militiae post munia trina superbum
 463 praefecturae apicem quarto jam culmine rexi.
 464 Sed dum me nostri princeps modo Maximus orbis
 465 ignarum, absentem procerum per mille repulsas
 466 ad lituos post jura vocat voluitque sonoris
 467 praeconem mutare tubis, promptissimus istud
 468 arripui officium, vos quo legatus adirem.
 469 Foedera prisca precor, quae nunc meus ille teneret,
 470 jussissem si forte, senex cui semper Avitum
 471 sectari crevisse fuit. Tractare solebam
 472 res Geticas olim ; scis te nescisse frequenter
 473 quae suasi nisi facta. Tamen fortuna priorem
 474 abripuit genium ; periit quodcumque merebar
 475 cum genitore tuo. Narbonem tabe solutum
 476 ambierat (tu parvus eras), trepidantia cingens
 477 milia in infames jam jamque coegerat escas.
 478 Jam tristis propriae credebat defore praedae,
 479 si clausus fortasse perit, cum nostra probavit
 480 consilia et refugo laxavit moenia bello.
 481 Teque ipsum (sunt ecce senes) hoc pectore fultum
 482 hae flentem tenuere manus, si forsitan altrix
 483 te mihi, cum nolles, lactandum tolleret. Ecce
 484 advenio et prisca repeto modo pignus amoris.
 485 Si tibi nulla fides, nulla est reverentia patris,
 486 i durus pacemque nega." Prorumpit ab omni
 487 murmur concilio fremitusque, et proelia damnans
 488 seditiosa ciet concordem turba tumultum.
 489 Tum rex effatur : "Dudum, dux inclite, culpo
 490 poscere te pacem nostram, cum cogere possis
 491 servitium, trahere ac populos in bella sequaces.
 492 Ne, quaeso, invidiam patrio mihi nomine inuras :
 493 quid mereor, si nulla jubes ? Suadere sub illo
 494 quod poteras, modo velle sat est, solumque moratur,
 495 quod cupias, nescisse Getas. Mihi Romula dudum
 496 per te jura placent, parvumque ediscere jussit
 497 ad tua verba pater docili quo prisca Maronis
 498 carmine molliret Scythicos mihi pagina mores ;
 499 jam pacem tum velle doces. Sed percipe quae sit
 500 condicio obsequii : forsan rata pacta probabis.
 501 Testor, Roma, tuum nobis venerabile nomen
 502 et socium de Marte genus (vel quidquid ab aevo,
 503 nil te mundus habet melius, nil ipsa senatu),
 504 me pacem servare tibi vel velle abolere
 505 quae noster peccavit avus, quem fuscet id unum,
 506 quod te, Roma, capit ; sed di si vota secundant,
 507 excidii veteris crimen purgare valebit
 508 ultio praesentis, si tu, dux inclite, solum
 509 Augusti subeas nomen. Quid lumina flectis ?
 510 Invitum plus esse decet. Non cogimus istud,
 511 sed contestamur : "Romae sum te duce amicus,
 512 principe te miles." Regnum non praeripis ulli,
 513 nec quisquam Latias Augustus possidet arces ;
 514 quae vacat, aula tua est. Testor, non sufficit istud,
 515 ne noceam, atque tuo hoc utinam diademate fiat
 516 ut prosim ! Suadere meum est ; nam Gallia si te
 517 compulerit, quae jure potest, tibi pareat orbis,
 518 ne pereat." Dixit pariterque in verba petita

519 dat sanctam cum fratre fidem. Discedis, Avite,
 520 maestus, qui Gallos scires non posse latere
 521 quid possint servire Getae te principe. Namque
 522 civibus ut patuit trepidis te foedera ferre,
 523 occurrunt alacres ignaroque ante tribunal
 524 sternunt ; utque satis sibimet numerosa coisse
 525 nobilitas visa est, quam saxa nivalia Cotti
 526 despectant, variis nec non quam partibus ambit
 527 Tyrrheni Rhenique liquor, vel longa Pyrenei
 528 quam juga ab Hispano seclusam jure cohercent,
 529 aggreditur nimio curarum pondere tristem
 530 gaudens turba virum. Procerum tum maximus unus,
 531 dignus qui patriae personam sumeret, infit :
 532 "Quam nos per varios dudum fortuna labores
 533 principe sub puero laceris terat aspera rebus,
 534 fors longum, dux magne, queri, cum quippe dolentum
 535 maxima pars fueris, patriae dum vulnera lugens
 536 sollicitudinibus vehementibus exagitaris.
 537 Has nobis inter clades ac funera mundi
 538 mors vixisse fuit. Sed dum per verba parentum
 539 ignavas colimus leges santumque putamus
 540 rem veterem per damna sequi, portavimus umbram
 541 imperii, generis contenti ferre vetusti
 542 et vitia ac solitam vestiri murice gentem
 543 more magis quam jure pati. Promptissima nuper
 544 fulsit condicio, proprias qua Gallia vires
 545 exsereret, trepidam dum Maximus occupat urbem ;
 546 orbem sat potuit, si te tibi tota magistro
 547 regna reformasset. Quis nostrum Belgica rura,
 548 litus Aremorici, Geticas quis moverit iras,
 549 non latet : his tantis tibi cessimus, inclite, bellis.
 550 Nunc jam summa vocant ; dubio sub tempore regnum
 551 non regit ignavus. Postponitur ambitus omnis
 552 ultima cum claros quaerunt : post damna Ticini
 553 ac Trebiae trepidans raptim respublica venit
 554 ad Fabium ; Cannas celebres Varrone fugato
 555 Scipiadamque etiam turgentem funere Poenum
 556 Livius electus fregit. Captivus, ut aiunt,
 557 orbis in urbe jacet ; princeps perit, hic caput omne
 558 nunc habet imperium. Petimus, conscende tribunal,
 559 erige collapsos ; non hoc modo tempora poscunt,
 560 ut Romam plus alter amet. Nec forte reare
 561 te regno non esse parem : cum Brennica signa
 562 Tarpeium premerent, scis, tum respublica nostra
 563 tota Camillus erat, patriae qui debitus ultor
 564 textit fumantes hostili strage favillas.
 565 Non tibi centurias aurum populare paravit,
 566 nec modo venales numerosoque asse redemptae
 567 concurrunt ad puncta tribus ; suffragia mundi
 568 nullus emit. Pauper legeris ; quod sufficit unum,
 569 es meritis dives. Patriae cur vota moraris,
 570 quae jubet ut jubeas ? Haec est sententia cunctis :
 571 si dominus fis, liber ero." Fragor atria complet
 572 Ugerni, quo forte loco pia turba senatus
 573 detulerat vim, vota, preces. Locus, hora diesque
 574 dicitur imperio felix, ac protinus illic
 575 nobilium excubias gaudens sollertia mandat.
 576 Tertia lux refugis Hyperiona fuderat astris :

577 concurrunt proceres ac milite circumfuso
 578 aggere composito statuunt ac torque coronant
 579 castrensi maestum donantque insignia regni ;
 580 nam prius induerat solas de principe curas.
 581 Haud alio quondam vultu Tirynthius heros
 582 pondera suscepit caeli simul atque novercae,
 583 cum Libyca se rupe Gigas subduceret et cum
 584 tutior Herculeo sedisset machina dorso.
 585 "Hunc tibi, Roma, dedi, patulis dum Gallia campis
 586 intonat Augustum plausu faustumque fragorem
 587 portat in exsanguem Boreas jam fortior Austrum.
 588 Hic tibi restituet Libyen per vincula quarta,
 589 et cujus solum amissas post saecula multa
 590 Pannonias revocavit iter, jam credere promptum est
 591 quid faciat bellis. O quas tibi saepe jugabit
 592 inflictis gentes aquilis, qui maxima regni
 593 omina privatus fugit, cum forte vianti
 594 excuteret praepes plebeium motus amictum !
 595 Laetior at tanto modo principe, prisca deorum,
 596 Roma parens, attolle genas ac turpe veternum
 597 deponere ; en princeps faciet juvenescere major,
 598 quam pueri fecere senem." Finem pater ore
 599 vix dederat, plausere dei fremitusque cucurrit
 600 concilio. Felix tempus nevere sorores
 601 imperiis, Auguste, tuis et consulis anno
 602 fulva volubilibus duxerunt saecula pensis.

AD PRISCUM VALERIANUM VIRUM PRAEFECTORIUM

S8 v.1 Prisce, decus semper nostrum, cui principe Avito
 2 cognatum sociat purpura celsa genus,
 3 ad tua cum nostrae currant examina nugae,
 4 dico : "State, vagae ; quo properatis ? amat ;
 5 dstrictus semper censor, qui diligit, exstat ;
 6 dura fronte legit mollis amicitia.
 7 Nil totum prodest adjectum laudibus illud
 8 Ulpia quod rutilat porticus aere meo
 9 vel quod adhuc populo simul et plaudente senatu
 10 ad nostrum reboat concava Roma sophos."
 11 Respondent illae : "Properabimus, ibimus, et nos
 12 non retines : tanto iudice culpa placet.
 13 Cognitor hoc nullus melior ; bene carmina pensat
 14 contemptu tardo, iudicio celeri."
 15 Et quia non potui temeraria sistere verba,
 16 hoc rogo, ne dubites lecta dicare rogo.

AD FELICEM

S9 v.1 Dic, dic quod peto, Magne, dic, amabo,
 2 Felix nomine, mente, honore, forma,
 3 natis, conjuge, fratribus, parente,
 4 germanis genitoris atque matris

5 et summo patruelium Camillo :
 6 quid nugae temerarias amici,
 7 sparsit quas tenerae jocus juventae,
 8 in formam redigi jubes libelli,
 9 ingentem simul et repente fascem
 10 conflari invidiae et perire chartam ?
 11 Mandatis famulor, sed ante testor
 12 lector quas patieris hic salebras.
 13 Non nos currimus aggerem vetustum
 14 nec quicumque invenies ubi priorum
 15 antiquas terat orbitas Thalia.
 16 Non hic antipodas salumque rubrum,
 17 non hic Memnonios canemus Indos,
 18 Aurorae face civica perustos ;
 19 non Artaxata, Susa, Bactra, Carrhas,
 20 non coctam Babylona personabo,
 21 quae largum fluvio patens alumno
 22 inclusum bibit hinc et inde Tigrim.
 23 Non hic Assyriis Ninum priorem,
 24 non Medis caput Arbacen profabor,
 25 nec quam divite, cum refugit hostem,
 26 arsit Sardanapallus in favilla.
 27 Non Cyrum Astyagis loquar nepotem,
 28 nutritum ubere quem ferunt canino,
 29 cujus non valuit rapacitatem
 30 vel Lydi satiare gaza Croesi ;
 31 cujus nec feritas subacta tunc est,
 32 caesis milibus ante cum ducentis
 33 in vallis Scythicae coactus artum
 34 orbatae ad Tomyris veniret utrem.
 35 Non hic Cecropios leges triumphos,
 36 vel si quo Marathon rubet duello
 37 aut, cum milia mille concitaret,
 38 inflatum numerositate Xerxen,
 39 atque hunc fluminibus satis profundis
 40 confestim ebibitis adhuc sitisse ;
 41 nec non Thermopylas et Hellis undas
 42 spreteis obicibus soli salique
 43 insanis equitasse cum catervis
 44 admissoque in Athon tumente ponto
 45 juxta frondiferae cacumen Alpibus
 46 scalptas classibus isse per cavernas.
 47 Non prolem Garamantici Tonantis,
 48 regnis principibusque principantem,
 49 porrectas Asiae loquar paterno
 50 actum fulmine pervolasse terras
 51 et primum Darii tumultuantes
 52 praefectos satrapasque perculisse,
 53 mox ipsum solio patrum superbum
 54 cognatosque sibi deos crepantem
 55 captis conjuge, liberis, parente
 56 in casu hominis redire jussum,
 57 qui cum maxima bella concitasset
 58 tota et Persidis undique gregatae
 59 uno constituisset arma campo,
 60 hoc solum perhibetur assecutus,
 61 dormire ut melius liberet hosti.
 62 Non vectos Minyas loquente silva

63 dicam Phasiaco stetitisse portu,
64 forma percita cum ducis Pelasgi
65 molliret rabidos virago tauros,
66 nec tum territa, cum suus colonus
67 post anguis domiti satos molares
68 armatas tremebundus inter herbas
69 florere in segetem stuperet hostem
70 et pugnantibus hinc et hinc aristis
71 supra belliferas madere glaebas
72 culmosos viridi cruore fratres.
73 Non hic terrigenam loquar cohortem
74 admixto mage vividam veneno,
75 cui praeter speciem modo carentem
76 angues corporibus voluminosis
77 alte squamea crura porrigentes
78 in vestigia fauce desinebant.
79 Sic formae triplicis procax juvenus
80 tellurem pede proterens voraci
81 currebat capitum stupenda gressu
82 et cum classica numinum sonabant
83 mox contra tonitrus resibilante
84 audebat superos ciere planta.
85 Nec Phlegrae legis ampliata rura,
86 missi dum volitant per astra montes
87 Pindus, Pelion, Ossa, Olympus, Othrys
88 cum silvis, gregibus, feris, pruinis,
89 saxis, fontibus, oppidis levati
90 vibrantum spatiosiore dextra.
91 Non hic Herculis excolam labores,
92 cui sus, cerva, leo, Gigas, Amazon,
93 hospes, taurus, Eryx, aves, Lycus, fur,
94 Nessus, Libs, juga, poma, virgo, serpens,
95 Oete, Thraces equi, boves Hiberæ,
96 luctator fluvius, canis triformis
97 portatusque polus polum dederunt.
98 Non hic Elida nobilem quadrigis
99 nec notam minus amnis ex amore
100 versu prosequar, ut per ima ponti
101 Alpheus fluat atque transmarina
102 in fluctus cadat unda conjugales.
103 Non hic Tantaleam domum retexam,
104 qua mixtum Pelopea per parentem est
105 prolis facta soror novoque monstro
106 infamem genuit pater nepotem ;
107 nil maestum hic canitur ; nec esulentam
108 fletus pingimus ad dapem Thyestæ,
109 fratris crimine qui miser voratis
110 vivum pignoribus fuit sepulcrum,
111 cum post has epulas repente flexis
112 Titan curribus occidens ad ortum
113 convivam fugeret, diem fugaret.
114 Nec Phryx pastor erit tibi legendus,
115 decrescens cui Dindymon reciso
116 fertur vertice texuisse classem,
117 cum jussu Veneris patrocinantis
118 terras Oebalias et hospitales
119 raptor depopulatus est Amyclas,
120 praedam trans pelagus petens sequacem.

121 Sed nec Pergama nec decenne bellum
122 nec saevas Agamemnonis phalangas
123 nec perjuriam persequar Sinonis,
124 arx quo Palladio dicata signo
125 pellaci reserata proditore
126 portantem pedites equum recepit.
127 Non hic Maeoniae stilo Camenae
128 civis Dulichiique Thessalique
129 virtutem sapientiamque narro,
130 quorum hic Peliaco putatur antro
131 venatu, fidibus, palaestra et herbis
132 sub Saturnigena sene institutus,
133 dum nunc lustra terens puer ferarum
134 passim per Pholoen jacet nivosam,
135 nunc praesepibus accubans amatis
136 dormit mollius in juba magistri ;
137 inde Scyriadum datus parenti
138 falsae nomina pertulisse Pyrrhae
139 atque inter tetricae choros Minervae
140 occultos Veneri rotasse thyrsos ;
141 postremo ad Phrygiae sonum rapinae
142 tractus laudibus Hectoris trahendi.
143 Ast illum, cui contigit paternam
144 quartum post Ithacam redire lustrum,
145 nec Zmyrnae satis explicat volumen.
146 Nam quis continuare possit illos
147 quos terra et pelago tulit labores :
148 raptum Palladium, repertum Achillem,
149 captum praepetibus Dolona plantis
150 et Rhesi niveas prius quadrigas
151 Xanthi quam biberent fluenta tractas,
152 ereptam quoque quam deus patronus,
153 Philocteta, tibi dedit pharetram,
154 Ajacem Telamonium furentem
155 quod sese ante rates agente causam
156 pugnacis tulit eloquens coronam,
157 vitatum hinc Polyphemon atque Circen
158 et Laestrygonii famem tyranni,
159 tum pomaria divitis Calypso et
160 Sirenas pereuntibus placentes,
161 vitatas tenebras facemque Naupli
162 et Scyllae rabidum voracis inguen
163 vel Tauromenitana quos Charybdis
164 ructato scopulos cavat profundo ?
165 Non divos specialibus faventes
166 agris, urbibus insulisque canto,
167 Saturnum Latio Jovemque Cretae
168 Junonemque Samo Rhodoque Solem,
169 Hennae Persephonen, Minervam Hymetto,
170 Vulcanum Liparae, Papho Dionen,
171 Argis Persea, Lampsaco Priapum,
172 Thebis Euhion Ilioque Vestam,
173 Thymbrae Delion, Arcadem Lycaeo,
174 Martem Thracibus ac Scythis Dianam,
175 quos fecere deos dicata templa,
176 tus, sal, far, mola vel superfluarum
177 consecratio caerimoniarum.
178 Non cum Triptolemo verendam Eleusin,

179 qui primas populis dedere aristas
 180 pastis Chaonium per ilicetum,
 181 non Apin Mareoticum sonabo
 182 ad Memphitica sinistra concitari.
 183 Non dicam Lacedaemonos juventam
 184 unctas Tyndaridis dicasse luctas,
 185 doctos quos patriis palen Therapnis
 186 gymnas Bebrycii tremit theatri ;
 187 non sortes Lyciasque Caeritumque,
 188 responsa aut Themidis priora Delphis,
 189 nec quae fulmine Tuscus expiato
 190 saeptum numina quaerit ad bidental ;
 191 nec quos Euganeum bibens Timavum
 192 colle Antenoreo videbat augur
 193 divos Thessalicam movere pugnam ;
 194 nec quos Amphiaraus et Melampus
 195 [LACUNE]
 196 ex ipsis rapuit deos favillis
 197 per templum male fluctuante flamma
 198 gaudens lumine perduto Metellus.
 199 Non hic Cinyphius canetur Hammon
 200 mitratum caput elevans harenis,
 201 vix se post hecatombion litatum
 202 suetus promere Syrtium barathro.
 203 Non hic Dindyma nec crepante buxo
 204 Curetas Berecynthiam sonantes,
 205 non Bacchum trieterica exserentem
 206 describam et tremulas furore festo
 207 ire in Bassaridas vel infulatos
 208 aram ad turicremam rotare mystas.
 209 Non hic Hesiodaea pinguis Ascræ
 210 spectes carmina Pindarique chordas ;
 211 non hic socciferi jocos Menandri,
 212 non laesi Archilochi feros iambos,
 213 vel plus Stesichori graves Camenas,
 214 aut quod composuit puella Lesbis ;
 215 non quod Mantua contumax Homero
 216 adjecit Latiaribus loquelis,
 217 aequari sibimet subinde livens
 218 busto Parthenopam Maroniano ;
 219 non quod post saturas epistularum
 220 sermonumque sales novumque epodon,
 221 libros carminis ac poeticam artem
 222 Phoebi laudibus et vagae Dianae
 223 conscriptis voluit sonare Flaccus ;
 224 non quod Papinius tuus meusque
 225 inter Labdacios sonat furores
 226 aut cum forte pedum minore rhythmò
 227 pingit gemmea prata silvularum.
 228 Non quod Corduba praepotens alumnis
 229 facundum ciet, hic putes legendum,
 230 quorum unus colit hispidum Platona
 231 incassumque suum monet Neronem,
 232 orchestram quatit alter Euripidis,
 233 pictum faecibus Aeschylon secutus
 234 aut plaustris solitum sonare Thespin,
 235 qui post pulpita trita sub cothurno
 236 ducebant olidae marem capellae ;

237 pugnam tertius ille Gallicani
 238 dixit Caesaris, ut gener socerque
 239 cognata impulerint in arma Romam,
 240 tantum dans lacrimas suis Philippis,
 241 ut credat Cremerae levem ruinam,
 242 infra et censeat Alliam dolendam
 243 ac Brenni in trutina Jovem redemptum,
 244 postponat Trebiam gravesque Cannas,
 245 stragem nec Trasimenicam loquatur,
 246 fratres Scipiadas putet silendos,
 247 quos Tartesiacus retentat orbis,
 248 Euphraten taceat male appetitum,
 249 Crassorum et madidas cruore Carrhas
 250 vel quos, Spartace, consulum solebas
 251 victrici gladios fugare sica,
 252 ipsum nec fleat ille plus duellum,
 253 quod post Cimbrica turbidus trophaea
 254 et vinctum Nasamonium Jugurtham,
 255 dum quaerit Mithridaticum triumphum,
 256 Arpinas voluit movere Sullae.
 257 Non Gaetulicus hic tibi legetur,
 258 non Marsus, Pedo, Silius, Tibullus,
 259 non quod Sulpiciae jocus Thaliae
 260 scripsit blandiloquum suo Caleno,
 261 non Persi rigor aut lepos Properti,
 262 sed nec centimeter Terentianus.
 263 Non Lucilius hic Lucretiusque est,
 264 non Turnus, Memor, Ennius, Catullus,
 265 Stella et Septimius Petroniusque
 266 aut mordax sine fine Martialis,
 267 non qui tempore Caesaris secundi
 268 aeterno incoluit Tomos reatu,
 269 nec qui consimili deinde casu
 270 ad vulgi tenuem strepentis auram
 271 irati fuit histrionis exsul,
 272 non Pelusiaco satus Canopo,
 273 qui ferruginei toros mariti
 274 et Musa canit inferos superna,
 275 nec qui jam patribus fuere nostris
 276 primo tempore maximi sodales,
 277 quorum unus Bonifatium secutus
 278 nec non praecipitem Sebastianum
 279 natales puer horruit Cadurcos
 280 plus Pandionias amans Athenas ;
 281 cujus si varium legas poema,
 282 tunc Phoebum vel Hyantias puellas
 283 potato madidas ab Hippocrene,
 284 tunc Amphiona filiumque Maiae,
 285 tunc vatem Rhodopeium sonare
 286 collato modulamine arbitraris.
 287 Non tu hic nunc legeris tuumque fulmen,
 288 o dignissime Quintianus alter,
 289 spernens qui Ligurum solum et penates
 290 mutato lare Gallias amasti,
 291 inter classica, signa, pila, turmas
 292 laudans Aetium vacansque libro,
 293 in castris hederate laureatis.
 294 Sed nec tertius ille nunc legetur,

295 Baetin qui patrium semel relinquens
 296 undosae petiit sitim Ravennae,
 297 plosores cui fulgidam Quirites
 298 et carus popularitate princeps
 299 Trajano statuam foro locarunt.
 300 Sed ne tu mihi comparare temptes,
 301 quos multo minor ipse plus adoro,
 302 Paulinum Ampeliumque Symmachumque,
 303 Messalam ingenii satis profundi
 304 et nulli modo Martium secundum,
 305 dicendi arte nova parem vetustis
 306 Petrum et cum loquitur nimis stupendum,
 307 vel quem municipalibus poetis
 308 praeponit bene vilicum senatus,
 309 nostrum aut quos retinet solum disertos,
 310 dulcem Anthedion et mihi magistri
 311 Musas sat venerabiles Hoeni,
 312 acrem Lampridium, catum Leonem
 313 praestantemque tuba Severianum
 314 et sic scribere non minus valentem,
 315 Marcus Quintilianus ut solebat.
 316 Nos valde sterilis modos Camenae
 317 rarae credimus hos brevisque chartae,
 318 quae scombro merito piperque portet.
 319 Nam quisnam deus hoc dabit rejectae,
 320 ut vel suscipiens bonos odores,
 321 nardum ac pingua Nicerotianis
 322 quae fragrant alabastra tincta sucis,
 323 Indo cinnamon ex rogo petitum,
 324 quo Phoenix juvenescit occidendo,
 325 costum, malobathrum, rosas, amomum,
 326 myrrham, tus opobalsamumque servet ?
 327 Quapropter facinus meum tuere
 328 et condiscipuli tibi obsequentis
 329 incautum, precor, asseras pudorem.
 330 Germanum tamen ante sed memento,
 331 doctrinae columen, Probum advocare,
 332 isti qui valet exarationi
 333 destrictum bonus applicare theta.
 334 Novi sed bene, non refello culpam,
 335 nec doctis placet impudens poeta ;
 336 sed nec turgida contumeliosi
 337 lectoris nimium verebor ora,
 338 si tamquam gravior severiorque
 339 nostrae Terpsichores jocum refutans
 340 rugato Cato tertius labello
 341 narem rhinocerotica minetur.
 342 Non te terreat hic nimis peritus ;
 343 verum si cupias probare, tanta
 344 nullus scit, mihi crede, quanta nescit.

PRAEFATIO EPITHALAMII DICTI RURICIO ET HIBERIAE

S10 v.1 Flucticolae cum festa nurus Pagasaea per antra
 2 rupe sub Emathia Pelion explicuit,

3 angustabat humum superum satis ampla supellex ;
 4 certabant gazis hinc polus hinc pelagus ;
 5 ducebatque choros viridi prope tectus amictu
 6 caeruleae pallae concolor ipse socer ;
 7 nympa quoque in thalamos veniens de gurgite nuda
 8 vestiti coepit membra timere viri.
 9 Tum divum quicumque aderat terrore remoto
 10 quo quis pollebat lusit in officio.
 11 Juppiter emisit tepidum sine pondere fulmen
 12 et dixit : "Melius nunc Cytherea calet."
 13 Pollux tum caestu laudatus, Castor habenis,
 14 Pallas tum cristis, Delia tum pharetris ;
 15 Alcides clava, Mavors tum lusit in hasta,
 16 Arcas tum virga, nebride tum Bromius.
 17 Hic et Pipliadas induxerat optimus Orpheus
 18 chordis, voce, manu, carminibus, calamis.
 19 Ambitiosus Hymen totas ibi contulit artes ;
 20 qui non ingenio, fors placuit genio.
 21 Fescennina tamen non sunt admissa priusquam
 22 intonuit solita noster Apollo lyra.

EPITHALAMIUM

S11 v.1 Inter Cyaneas cautes, ubi forte vagantem,
 2 dum fugit, et fixit trepidus Symplegada Tiphys,
 3 atque recurrentem ructatam ad rauca Maleam,
 4 [LACUNE]
 5 qua super Idalium levat Orithyion in aethram
 6 [LACUNE]
 7 exit in Isthmiacum pelagus claudentibus alis
 8 saxorum de rupe sinus, quo saepe recessu
 9 sic tamquam toto coeat de lumine caeli,
 10 artatur collecta dies tremulasque per undas
 11 insequitur secreta vadi, transmittitur alto
 12 perfusus splendore latex, mirumque relatu,
 13 lymphha bibit solem tenuique inserta fluento
 14 perforat arenti radio lux sicca liquorem.
 15 Profecit studio spatium ; nam Lemnius illic
 16 ceu templum lusit Veneri fulmenque relinquens
 17 hic ferrugineus fumavit saepe Pyragmon.
 18 Hic lapis est de quinque locis dans quinque colores,
 19 Aethiops, Phrygius, Parius, Poenus, Lacedaemon,
 20 purpureus, viridis, maculosus, eburnus et albus.
 21 Postes chrysolithi fulvus diffulgurat ardor ;
 22 myrrhina, sardoniches, amethystus Hiberus, iaspis
 23 Indus, Chalcidicus, Scythicus, beryllus, achates
 24 attolunt duplices argenti cardine valvas,
 25 per quas inclusi lucem vomit umbra smaragdi ;
 26 limina crassus onyx crustat propterque hyacinthi
 27 caerula concordem laciunt in stagna colorem.
 28 Exterior non compta silex, sed prominet alte
 29 asper ab adsiduo lympharum verbere pumex.
 30 Interiore loco simulavit Mulciber auro
 31 exstantes late scopulos atque arte magistra
 32 ingenti cultu naturae inculta fefellit,
 33 huic operi insistens, quod necdum noverat illa
 34 quae post Lemniacis damnavit furta catenis.
 35 Squameus huc Triton duplicis confinia dorsi

36 qua coeunt supra sinuamina tortilis alvi,
 37 inter aquas calido portabat corde Dionen.
 38 Sed premit adjecto radiantis pondere conchae
 39 semiferi Galatea latus, quod pollice fixo
 40 vellit, et occulto spondet conubia tactu ;
 41 tum gaudens torquente joco subridet amator
 42 vulnere jamque suam parcenti pistre flagellat.
 43 Pone subit turmis flagrantibus agmen Amorum ;
 44 hic cohibet delphina rosis, viridique juvenco
 45 hic vectus spretis pendet per cornua frenis ;
 46 hi stantes motu titubant plantaque madenti
 47 labuntur firmantque pedum vestigia pennis.
 48 Illa recurvato demiserat ora lacerto
 49 mollia ; marcebant violae graviorque sopore
 50 coeperat attritu florum descendere cervix.
 51 Solus de numero fratrum qui pulchrior ille est
 52 deerat Amor, dum festa parat celeberrima Gallis,
 53 quae socer Ommatius, magnorum major avorum
 54 patriciaeque nepos gentis, natae generoque
 55 excolit auspiciis faustis. Sed fulsit ut ille
 56 forte dies, matrem celeri petit ipse volatu,
 57 cui fax, arcus, gorytus pendebat. At ille
 58 cernuus et laevae pendens in margine palmae
 59 libratos per inane pedes adverberat alis,
 60 oscula sic matris carpens somnoque refusae
 61 semisopora levi scalpebat lumina penna.
 62 Tum prior his alacer coepit : " Nova gaudia porto
 63 felicis praedae, genetrix. Calet ille superbus
 64 Ruricius nostris facibus dulcique veneno
 65 tactus votivum suspirat corde dolorem.
 66 Esset si praesens aetas, impenderet illi
 67 Lemnias imperium, Cressa stamen labyrinthi,
 68 Alceste vitam, Circe herbas, poma Calypso,
 69 Scylla comas, Atalanta pedes, Medea furores,
 70 Hippodame ceras, cygno Jove nata coronam ;
 71 huic Dido in ferrum, simul in suspendia Phyllis,
 72 Evadne in flammis et Sestias isset in undas. "
 73 His haec illa refert : "Gaudemus, nate, rebellem
 74 quod vincis laudasque virum ; sed forma puellae est
 75 quam si spectasset quondam Stheneboeius heros,
 76 non pro contemptu domuisset monstra Chimaerae ;
 77 Thermodontiaca vel qui genetrice superbus
 78 sprevit Gnosiacae temeraria vota novercae,
 79 hac visa occiderat, fateor, sed crimine vero ;
 80 et si iudicio forsitan mihi quarta fuisset,
 81 me quoque Rhoetea damnasset pastor in Ida ;
 82 " vincere " vel " si optas, istam da, malo, puellam "
 83 dixerat : hanc dederam formam pro munere formae.
 84 Tantus honor geniusque genis ; collata rubori
 85 pallida blatta latet depressaque lumine vultus
 86 nigrescunt vincto baccarum fulgura collo.
 87 Te quoque multimodis ambisset, Hiberia, ludis,
 88 axe Pelops, cursu Hippomenes luctaque Achelous,
 89 Aeneas bellis spectatus, Gorgone Perseus ;
 90 nec minor haec species totiens cui Juppiter esset
 91 Delia, taurus, olor, Satyrus, draco, fulmen et aurum.
 92 Quare age, jungantur ; nam census, forma genusque
 93 conveniunt : nil hic dispar tua fixit harundo.

94 Sed quid vota moror ? " Dixit currumque poposcit,
 95 cui dederant crystalla jugum, quae frigore primo
 96 orbis adhuc teneri, glacies ubi Caucason auget,
 97 strinxit Hyperboreis Tanaitica crusta pruinis
 98 naturam sumens gemmae quia perdidit undae.
 99 Perforat hunc fulvo formatus temo metallo ;
 100 miserat hoc fluuius cujus sub gurgite Nymphae
 101 Mygdonium fovere Midam, qui pauper in auro
 102 ditavit versis Pactoli flumina votis.
 103 Splendet perspicuo radios rota margine cingens
 104 Marmaricae de fauce ferae, dum belua curvis
 105 dentibus excussis gemit exarmarier ora ;
 106 misit et hoc munus tepidas qui nudus Erythras,
 107 concolor Aethiopi vel crinem pinguis amomo,
 108 fluxus odoratis vexat venatibus Indus.
 109 Illa tamen pasci suetos per Cypron olores
 110 vittata stringit myrto, quis cetera tensis
 111 lactea puniceo sinuantur colla corallo.
 112 Ergo iter aggressi : pendens rota sulcat inanem
 113 aera et in liquido non solvitur orbita tractu.
 114 Hic triplex uno comitatur Gratia nexu,
 115 hic redolet patulo Fortunae Copia cornu,
 116 hic spargit calathis, sed flores Flora perennes,
 117 hic Cererem Siculam Pharius comitatur Osiris,
 118 hic gravidos Pomona sinus pro tempore portat,
 119 hic Pallas madidis venit inter prela trapetis,
 120 hic distincta latus maculosa nebride Thyias
 121 Indica Echionio Bromii rotat orgia thyrso,
 122 hic et Sigeis specubus qui Dindyma ludit,
 123 jam sectus recalet Corybas, cui gutture ravo
 124 ignem per biformes regemunt cava buxa cavernas.
 125 Sic ventum ad thalamos : tus, nardum, balsama, myrrhae
 126 hic sunt, hic Phoenix busti dat cinnama vivi.
 127 Proxima quin etiam festorum afflata calore
 128 jam minus alget hiemps, speciemque tenentia vernam
 129 hoc dant vota loco quod non dant tempora mundo.
 130 Tum Paphie dextram juvenis dextramque puellae
 131 complectens paucis cecinit sollemnia dictis,
 132 ne facerent vel verba moram : " Feliciter aevum
 133 ducite concordem ; sint nati sintque nepotes ;
 134 cernat et in proavo sibimet quod pronepos optet. "

AD V.C. CATULLINUM

S12 v.1 Quid me, etsi valeam, parare carmen
 2 Fescennicolae jubes Diones
 3 inter crinigeras situm catervas
 4 et Germanica verba sustinentem,
 5 laudantem tetrico subinde vultu
 6 quod Burgundio cantat esculentus
 7 infundens acido comam butyro ?
 8 Vis dicam tibi, quid poema frangat ?
 9 Ex hoc barbaricis abacta plectris
 10 spernit senipedem stilum Thalia,
 11 ex quo septipedes videt patronos.

12 Felices oculos tuos et aures
 13 felicemque libet vocare nasum,
 14 cui non allia sordidumque cepe
 15 ructant mane novo decem apparatus,
 16 quem non ut vetulum patris parentem
 17 nutricisque virum die nec orto
 18 tot tantique petunt simul Gigantes
 19 quot vix Alcinoi culina ferret.
 20 Sed jam Musa tacet tenetque habenas
 21 paucis hendecasyllabis jocata,
 22 ne quisquam satiram vel hos vocaret.

AD IMPERATOREM MAIORIANUM

S13 v.1 Amphitryoniaden perhibet veneranda vetustas,
 2 dum relevat terras, promeruisse polos.
 3 Sed licet in nuda torvus confregerit ulna
 4 ille Cleonaeae guttura rava ferae,
 5 et quamquam ardenti gladio vix straverit hydram,
 6 cum duplices pareret vulnere mors animas,
 7 captivumque ferens silva ex Erymanthide monstrum
 8 exarmata feri riserit ora suis,
 9 collaque flammigenae disrumpens fumida furis
 10 tandem directas jusserit ire boves,
 11 taurus, cerva, Gigas, hospes, luctator, Amazon,
 12 Cres, canis, Hesperides sint monimenta viri,
 13 nulla tamen fuso prior est Geryone pugna,
 14 uni tergeminum cui tulit ille caput.
 15 Haec quondam Alcides ; at tu Tirynthius alter,
 16 sed princeps, magni maxima cura dei,
 17 quem draco, cervus, aper paribus sensere sagittis,
 18 cum dens, cum virus, cum fuga nil valuit,
 19 Geryones nos esse puta monstrumque tributum :
 20 hinc capita, ut vivam, tu mihi tolle tria.
 21 Has supplex famulus preces dicavit
 22 responsum opperiens pium ac salubre.
 23 Ut reddas patriam simulque vitam
 24 Lugdunum exonerans suis ruinis,
 25 hoc te Sidonius tuus precatur :
 26 sic te Sidonio recocta fuco
 27 multos purpura vestiat per annos ;
 28 sic lustris imperii perennis acto
 29 quinquennalia fascibus dicentur ;
 30 sic ripae duplicis tumore fracto
 31 detonsus Vachalim bibat Sygamber.
 32 Quod si contuleris tuo poetae,
 33 mandem perpetuis legenda fastis
 34 quaecumque egregiis geris triumphis.
 35 Nam nunc Musa loquax tacet tributo,
 36 quae pro Vergilio Terentioque
 37 sextantes legit unciasque fisci,
 38 Marsyaeque timet manum ac rudentem,
 39 qui Phoebi ex odio vetustiore
 40 nunc suspendia vatibus minatur.

PRAEFATIO EPITHALAMII DICTI POLEMIO ET ARANEOLAE

S14 v.1 Prosper conubio dies coruscat,
 2 quem Clotho niveis benigna pensis,
 3 albus quem picei lapillus Indi,
 4 quem pacis simul arbor et juventae
 5 aeternumque virens oliva signet.
 6 Eia, Calliope, nitente palma
 7 da sacri laticis loquacitatem,
 8 quem fodit pede Pegasus volanti
 9 cognato madidus jubam veneno.
 10 Non hic impietas, nec hanc puellam
 11 donat mortibus ambitus procorum ;
 12 non hic Oenomai cruenta circo
 13 audit pacta Pelops nec insequentem
 14 pallens Hippomenes ad ima metae
 15 tardat Schoenida ter cadente pomo ;
 16 non hic Herculeas videt palaestras
 17 Aetola Calydon stupens ab arce,
 18 cum cornu fluvii superbientis
 19 Alcides premeret, subinde fessum
 20 undoso refovens ab hoste pectus ;
 21 sed doctus juvenis decensque virgo,
 22 ortu culmina Galliae tenentes,
 23 junguntur ; cito, diva, necte chordas
 24 nec, quod detonuit Camena major,
 25 nostram pauperiem silere cogas.
 26 Ad taedas Thetidis probante Phoebos
 27 et Chiron cecinit minore plectro,
 28 nec risit pia turba rusticantem,
 29 quamvis saepe senex biformis illic
 30 carmen rumperet hinniente cantu.

EPITHALAMIVM

S15 v.1 Forte procellosi remeans ex arce Capherei,
 2 Phoebados Iliacae raptum satis ultra pudorem,
 3 Pallas Erechtheo Xanthum mutabat Hymetto.
 4 Aurato micat aere caput majusque serenum
 5 de terrore capit ; posito nam fulmine necdum
 6 Cinyphio Tritone truces hilaraverat artus.
 7 Gorgo tenet pectus medium, factura videnti
 8 et truncata moras ; nitet insidiosa superbum
 9 effigies vivitque anima pereunte venustas ;
 10 alta cerastarum spiris caput asperat atrum
 11 congeries, torquet maculosa volumina mordax
 12 crinis, et irati dant sibila taetra capilli.
 13 Squameus ad mediam thorax non pervenit alvum
 14 post chalybem pendente peplo ; tegit extima limbi
 15 circite palla pedes, qui cum sub veste moventur,
 16 crispato rigidae crepitant in syrmate rugae.
 17 Laevam parma tegit Phlegraei plena tumultus :
 18 hic rotat excussum vibrans in sidera Pindum
 19 Enceladus, ramdo fit missilis Ossa Typhoeo ;
 20 Porphyryon Pangaea rapit, Rhodopenque Damastor

21 Strymonio cum fonte levat, veniensque superne
22 intorto calidum restinguit flumine fulmen ;
23 hic Pallas Pallanta petit, cui Gorgone visa
24 invenit solidum jam lancea tarda cadaver ;
25 hic Lemnon pro fratre Mimas contra aegida torquet,
26 impulsumque quatit jaculabilis insula caelum ;
27 plurimus hic Briareus populoso corpore pugnat,
28 cognatam portans aciem, cui vertice ab uno
29 cernas ramosis palmas fruticare lacertis.
30 Nec species solas monstris, dedit arte furorem
31 Mulciber atque ipsas timuit quas finxerat iras.
32 Hastam dextra tenet, nuper quam valle Aracynthi
33 ipsa sibi posita Pallas protraxit oliva.
34 Hoc steterat genio, super ut vestigia divae
35 labentes teneat Marathonia baca trapetas.
36 Hic duo templa micant ; quorum supereminet unus
37 ut meritis sic sede locus, qui continet alta
38 scrutantes ratione viros quid machina caeli,
39 quid tellus, quid fossa maris, quid turbidus aer,
40 quid noctis lucisque vices, quid menstrua lunae
41 incrementa parent, totidem cur damna sequantur.
42 Ilicet hic summi resident septem sapientes,
43 innumerabilium primordia philosophorum :
44 Thales Mileto genitus vadimonia damnat ;
45 Lindie tu Cleobule jubes modus optimus ut sit ;
46 tu meditans totum decoras, Periandre, Corinthon ;
47 Atticus inde Solon " ne quid nimis " approbat unum ;
48 Prienaeae Bia, plures ais esse malignos ;
49 tu Mytilene satus cognoscere, Pittace, tempus,
50 noscere sese ipsum, Chilon Spartane, docebas.
51 Asserit hic Samius post docta silentia lustris
52 Pythagoras solidum princeps quod musica mundum
53 temperet et certis concentum reddat ab astris,
54 signaque zodiacus quae circulus axe supremo
55 terna quater retinet proprio non currere motu,
56 aequis inter se spatiis tamen esse locata
57 fixaque signifero pariter quoque cernua ferri,
58 praecipuumque etiam septem vaga sidera cantum
59 hinc dare, perfectus numerus quod uterque habeatur,
60 hoc numero adfirmans, hoc ordine cuncta rotari :
61 falciferi zonam ire senis per summa polorum,
62 Martis contiguum medio Jove pergere sidus,
63 post hos jam quarto se flectere tramite Solem,
64 sic placidam Paphien servare diastema quintum,
65 Arcadium sextum, Lunam sic orbe supremo
66 ter denas tropico prope currere climate myras.
67 Si quos ergo chelys, si quos lyra, tibia si quos
68 ediderint cum voce modos, exemplar ad istud
69 ponderibus positus, quantum proportio suadet,
70 intervalla sequi septeni sideris edit ;
71 harmoniam dicens etiam quod quattuor istis
72 sic sedeant elementa modis ut pondere magnis
73 sit locum inferior media tellure (quod autem
74 perfecte medium est, imum patet esse rotundi) ;
75 hinc fieri ut terram levior superemictet unda,
76 altior his quoque sit qui purior eminent aer,
77 omnia concludat caelum levitate suprema,
78 pendeat et totum simul hoc ab origine centri.

79 Thales hic etiam numeris perquirat et astris
80 defectum ut Phoebi nec non Lunaequae laborem
81 nuntiet antequam ; sed rebus inutile ponit
82 principium, dum credit aquis subsistere mundum.
83 Hujus discipuli versa est sententia dicens
84 principiis propriis semper res quasque creari,
85 singula qui quosdam fontes decernit habere
86 aeternum irriguos ac rerum semine plenos.
87 Hunc etiam sequitur qui gignere cuncta putabat
88 hunc aerem pariterque deos sic autumat ortos.
89 Quartus Anaxagoras Thaletica dogmata servat,
90 sed divinum animum sentit, qui fecerit orbem.
91 Junior huic junctus residet collega, sed idem
92 materiam cunctis creaturis aera credens
93 judicat inde deum, faceret quo cuncta, tulisse.
94 Post hos Arcesilas divina mente paratam
95 conicit hanc molem, confectam partibus illis
96 quas atomos vocat ipse leves. Socratica post hunc
97 secta micat, quae de naturae pondere migrans
98 ad mores hominum limandos transtulit usum.
99 Hanc sectam perhibent summum excoluisse Platona,
100 sed triplici formasse modo, dum primus et unus
101 physica vel logico, logicum vel jungit ad ethos.
102 Invenit hic princeps quid prima essentia distet
103 a summo sextoque bono : cum denique saxa
104 sint tantum penitusque nihil nisi esse probentur ;
105 proxima succedant, quibus esse et vivere promptum est,
106 addere quis possis nil amplius, arbor et herba ;
107 tertia sit pecorum, quorum esse et vivere motu
108 non caret et sensu ; mortales quarta deinde
109 respiciat factura suos, quibus esse, moveri,
110 vivere cum sensu datur, et supereminet illud,
111 quod sapiunt veroque valent discernere falsum ;
112 quinta creaturas superas substantia prodat,
113 quas quidam dixere deos, quia corpora sumant
114 contemplanda homini, paulo post ipsa relinquunt
115 inque suam redeant, si qua est tenuissima, formam -
116 sic fieri ut pateat substantia summa creator,
117 sexta tamen supraque nihil, sed cuncta sub ipso.
118 Hoc in gymnasio Polemi Sapiencia vitam
119 excolit adjunctumque suo fovet ipsa Platoni ;
120 obviam et quamquam totis Academia sectis
121 atque neget verum, veris hunc laudibus ornat.
122 Stoica post istos, sed concordantibus ipsis,
123 Chrysippus Zenonque docent praecepta tenere.
124 Exclusi prope jam Cynici, sed limine restant ;
125 ast Epicureos eliminat undique Virtus.
126 At parte ex alia textrino prima Minervae
127 palla Jovis rutilat, cujus bis coctus aeno
128 serica Sidonius fucabat stamina murex.
129 Ebria nec solum spirat conchyliis sandix ;
130 insertum nam fulgur habet, filoque rigenti
131 ardebat gravidum de fragmine fulminis ostrum.
132 Hic viridis patrio Glaucus pendebat amictu ;
133 undabant hic arte sinus, fictoque tumore
134 mersabat pandas tempestas texta carinas.
135 Amphitryoniadi surgebat tertia vestis :
136 parvulus hic gemino cinctus serpente novercae

137 inscius arridet monstris ludumque putando
138 insidias, dum nescit, amat vultuque dolentis
139 exstingui deflet quos ipse interficit angues.
140 Praeterea sparsis sunt haec subjecta figuris :
141 sus, leo, cerva, Gigans, taurus, juga, Cerberus, hydra,
142 hospes, Nessus, Eryx, volucres, Thrax, Cacus, Amazon,
143 Cres, fluvius, Libs, poma, Lycus, virgo, polus, Oete.
144 Hoc opus, et si quid superest quod numina vestit,
145 virgineae posuere manus. Sed in agmine toto
146 inter Cecropias Ephyreiadasque puellas
147 Araneola micat ; proprias conferre laborat
148 ipsa Minerva manus, calathisque evicta recedens
149 cum tenet haec telas vult haec plus tela tenere.
150 Hic igitur proavi trabeas imitata rigentes
151 palmatam parat ipsa patri, qua consul et idem
152 Agricolam contingat avum doceatque nepotes
153 non abavi solum sed avi quoque jungere fasces.
154 Texuerat tamen et chlamydes, quibus ille magister
155 per Tartesiacas conspectus splenduit urbes
156 et quibus ingestae sub tempore praefecturae
157 conspicuus sanctas reddit se praesule leges.
158 Attamen in trabea segmento luserat alto
159 quod priscis inlustre toris. Ithacesia primum
160 fabula Dulichiique lares formantur et ipsam
161 Penelopam tardas texit distexere telas.
162 Taenaron hic frustra bis rapta conjuge pulsat
163 Thrax fidibus, legem postquam temeravit Averni,
164 et prodesse putans iterum non respicit umbram.
165 Hic vovet Alceste praelato conjuge vitam
166 rumpere, quam cernas Parcarum vellere in ipso
167 nondum pernetam fato praestante salutem.
168 Hic nox natarum Danaei lucebat in auro,
169 quinquaginta enses genitor quibus impius aptat
170 et dat concordem discordia jussa furorem ;
171 solus Hypermestrae servatus munere Lynceus
172 effugit ; aspicias illam sibi parva paventem
173 et pro dimisso tantum pallere marito.
174 Jamque Jovem in formas mutat quibus ille tenere
175 Mnemosynam, Europam, Semelen, Ledam, Cynosuram
176 serpens, bos, fulmen, cygnus, Dictynna solebat.
177 Jamque opus in turrem Danaeae pluviamque metalli
178 ibat et hic alio stillabat Juppiter auro,
179 cum virgo aspiciens vidit Tritonida verso
180 lumine doctisonas spectare libentius artes ;
181 commutat commota manus ac pollice docto
182 pingere philosophi victricem Laida coepit,
183 quae Cynici per menta feri rugosaque colla
184 rupit odoratam redolenti forpice barbam.
185 Subrisit Pallas castoque haec addidit ore :
186 " Non nostra ulterius ridebis dogmata, virgo
187 philosopho nuptura meo ; mage flammea sumens
188 hoc mater sine texat opus. Consurge, sophorum
189 egregium Polemi decus, ac nunc Stoica tandem
190 pone supercilia et Cynicos imitatus amantes
191 incipies iterum parvum mihi ferre Platona. "
192 Haerentem tali compellat voce magister :
193 " Perge libens, neu tu damnes fortasse jugari,
194 quod noster jubet ille senex qui non piger hausit

195 numina contemplanz Anyto pallente venenum ".
 196 Dixerat ; ille simul surgit vultuque modesto
 197 tetrica nodosae commendat pallia clavae.
 198 Amborum tum diva comas viridantis olivae
 199 pace ligat, nectit dextras ac foedera mandat,
 200 Nymphidius quae cernat avus. Probat Atropos omen
 201 fulvaeque concordet junxerunt fila sorores.

EVCHARISTON AD FAVSTVM EPISCOPVM

S16 v.1 Phoebum et ter ternas decima cum Pallade Musas
 2 Orpheaue et laticem simulatum fontis equini
 3 Ogygiamque chelyn, quae saxa sequacia flectens
 4 cantibus auritos erexit carmine muros,
 5 sperne, fidis ; magis ille veni nunc spiritus, oro,
 6 pontificem dicture tuum, qui pectora priscae
 7 intrasti Mariae, rapiens cum tympana siccus
 8 Israel appensi per concava gurgitis iret
 9 aggeribus vallatus aquae mediasque per undas
 10 pulverulenta tuum clamaret turba triumphum ;
 11 quique manum Judith ferientem colla Olophernis
 12 juvisti, exciso jacuit cum gutture truncus
 13 et fragilis valido latuit bene sexus in ictu ;
 14 expresso vel qui complens de vellere pelvem
 15 inficiensque dehinc non tacto vellere terram
 16 firmasti Gedeona, tubis inserte canoris
 17 spiritus, et solo venit victoria cantu ;
 18 quique etiam adsumptum pecorosi de grege Jesse
 19 adflasti regem, plaustro cum foederis arcam
 20 imponens hostis nullo moderante bubulco
 21 proderet obscaenum turgenti podice morbum ;
 22 quique trium quondam puerorum in fauce sonasti,
 23 quos in Chaldaei positos fornace tyranni
 24 roscida combusto madefecit flamma camino ;
 25 quique volubilibus spatiantem tractibus alvi
 26 complesti Jonam, resonant dum viscera monstri
 27 introrsum psallente cibo vel pondera ventris
 28 jejuni plenique tamen vate intemerato
 29 ructat cruda fames, quem singultantibus extis
 30 esuriens vomuit suspensio belua morsu ;
 31 quique duplex quondam venisti in pectus Helisei,
 32 Thesbiten cum forte senem jam flammeus axis
 33 tolleret et scissam linquens pro munere pellem
 34 hispidus ardentis auriga intraret habenas ;
 35 quique etiam Heliam terris missure secundum
 36 Zachariae justis linguam placate ligasti,
 37 dum faceret serum rugosa puerpera patrem,
 38 edita significans jusso reticere propheta,
 39 gratia cum fulsit, nosset se ut lex taciturnam ;
 40 quique etiam nascens ex virgine semine nullo,
 41 ante ullum tempus deus atque in tempore Christus,
 42 ad corpus quantum spectat, tu te ipse creasti ;
 43 qui visum caecis, gressum quoque reddere claudis,
 44 auditum surdis, mutis laxare loquelam
 45 suetus ad hoc etiam venisti, ut mortua membra

46 lecto, sandapila, tumulo consurgere possint ;
 47 quique etiam poenas suscepta in carne tulisti,
 48 sustentans alapas, ludibria, verbera, vepres,
 49 sortem, vincla, crucem, clavos, fel, missile, acetum,
 50 postremo mortem, sed surrecturus, adisti,
 51 eripiens quidquid veteris migraverat hostis
 52 in jus per nostrum facinus, cum femina prima
 53 praeceptum solvens culpa nos perpete vinxit ;
 54 (qui cum te interitu petiit nec repperit in te
 55 quod posset proprium convincere, perdidit omne
 56 quod lapsu dedit Eva suo ; chirographon illud,
 57 quo pervasus homo est, haec compensatio rupit.
 58 Expers peccati pro peccatoribus amplum
 59 fis pretium veteremque novus vice faenoris Adam,
 60 dum moreris, de morte rapis. Sic mortua mors est,
 61 sic sese insidiis quas fecerat ipsa fefellit ;
 62 nam dum indiscrete petit insontemque reosque,
 63 egit ut absolvi possent et crimine nexi) ;
 64 quique etiam justos ad tempus surgere tecum
 65 jussisti cineres, cum tectis tempore longo
 66 irrupit festina salus infusaque raptim
 67 excussit tumulis solidatas vita favillas :
 68 da Faustum laudare tuum, da solvere grates,
 69 quas et post debere juvat. Te, magne sacerdos,
 70 barbitus hic noster plectro licet impare cantat.
 71 Haec igitur prima est vel causa vel actio laudum,
 72 quod mihi germani, dum lubrica volvitur aetas,
 73 servatus tecum domini per dona probatur
 74 nec fama titubante pudor ; te respicit istud
 75 quantumcumque bonum ; merces debebitur illi
 76 ille tibi. Sit laus, si labi noluit, ejus ;
 77 nam quod nec potuit, totum ad te jure redundat.
 78 Praeterea quod me pridem Reios veniente,
 79 cum Procyon fureret, cum solis torridus ignis
 80 flexilibus rimis sitientes scriberet agros,
 81 hospite te nostros exceptit protinus aestus
 82 pax, domus, umbra, latex, benedictio, mensa, cubile.
 83 Omnibus attamen his sat praestat quod voluisti
 84 ut sanctae matris sanctum quoque limen adirem.
 85 Derigui, fateor, mihi conscius atque repente
 86 tinxit adorantem pavido reverentia vultum ;
 87 nec secus intremui quam si me forte Rebeccae
 88 Israel aut Samuel crinitus duceret Annae.
 89 Quapropter te vel votis sine fine colentes
 90 affectum magnum per carmina parva fatemur.
 91 Seu te flammatae Syrtes et inhospita tesqua
 92 seu caeno viridante palus seu nigra recessu
 93 incultum mage saxa tenent, ubi sole remoto
 94 concava longaevas adservant antra tenebras ;
 95 seu te praeruptis porrecta in rupibus Alpibus
 96 succinctos gelido libantem caespitem somnos,
 97 anachoreta, tremet (quae quamquam frigora portet,
 98 conceptum Christi numquam domat illa calorem),
 99 qua nunc Helias, nunc te jubet ire Johannes,
 100 nunc duo Macarii, nunc et Paphnutius heros,
 101 nunc Or, nunc Ammon, nunc Sarmata, nunc Hilarion,
 102 nunc vocat in tunica nudus te Antonius illa
 103 quam fecit palmae foliis manus alma magistri ;

104 seu te Lirinus priscum complexa parentem est,
 105 qua tu jam fractus pro magna saepe quiete
 106 discipulis servire venis vixque otia somni,
 107 vix coctos capture cibos abstemius aevum
 108 ducis et insertis pinguis jejunia psalmis,
 109 fratribus insinuans quantos illa insula plana
 110 miserit in caelum montes, quae sancta Caprasi
 111 vita senis juvenisque Lupi, quae gratia patrem
 112 mansit Honoratum, fuerit quis Maximus ille,
 113 urbem tu cujus monachosque antistes et abbas
 114 bis successor agis, celebrans quoque laudibus illis
 115 Eucherii venientis iter, redeuntis Hilari ;
 116 seu te commissus populus tenet et minor audet
 117 te medio tumidos majorum temnere mores ;
 118 seu tu sollicitus curas qua languidus esca
 119 quave peregrinus vivat, quid pascat et illum,
 120 lubrica crura cui tenuat sub compede carcer ;
 121 seu mage funeribus mentem distractus humanis,
 122 livida defuncti si pauperis ossa virescant,
 123 infastiditum fers ipse ad busta cadaver ;
 124 seu te conspicuis gradibus venerabilis arae
 125 contionaturum plebs sedula circumstetit,
 126 expositae legis bibat auribus ut medicinam :
 127 quidquid agis, quocumque loci es, semper mihi Faustus,
 128 semper Honoratus, semper quoque Maximus esto.

AD V.C. OMMATIUM

S17 v.1 Quattuor ante dies quam lux Sextilis adusti
 2 prima spiciferum proferat orbe caput,
 3 natalis nostris decimus sextusque coletur,
 4 adventu felix qui petit esse tuo.
 5 Non tibi gemmatis ponentur prandia mensis,
 6 Assyrius murex nec tibi sigma dabit ;
 7 nec per multiplices abaco splendente cavernas
 8 argenti nigri pondera defodiam ;
 9 nec scyphus hic dabitur rutilo cui forte metallo
 10 crustatum stringat tortilis ansa latus.
 11 Fercula sunt nobis mediocria, non ita facta
 12 mensurae ut grandis suppleat ars pretium.
 13 Non panes Libyca solitos flavescere Syrte
 14 accipiet Galli rustica mensa tui.
 15 Vina mihi non sunt Gazetica, Chia, Falerna
 16 quaeque Sarepteno palmite missa bibas.
 17 Pocula non hic sunt industria nomine pagi
 18 quem posuit nostris ipse triumvir agris.
 19 Tu tamen ut venias petimus ; dabit omnia Christus,
 20 hic mihi qui patriam fecit amore tuo.

DE BALNEIS VILLAE SUAE

S18 v.1 Si quis Avitacum dignaris visere nostram,
 2 non tibi displiceat : sic quod habes placeat.
 3 Aemula Baiano tolluntur culmina cono
 4 parque cothurnato vertice fulget apex.
 5 Garrula Gauranis plus murmurat unda fluentis

6 contigui collis lapsa supercilio.
 7 Lucrinum stagnum dives Campania nollet,
 8 aequora si nostri cerneret illa lacus.
 9 Illud puniceis ornatur litus echinis :
 10 piscibus in nostris, hospes, utrumque vides.
 11 Si libet et placido partiris gaudia corde,
 12 quisquis ades, Baias tu facis hic animo.

DE PISCINA SUA

S19 v.1 Intrate argentes post balnea torrida fluctus
 2 ut solidet calidam frigore lymphæ cutem ;
 3 et licet hoc solo mergatis membra liquore,
 4 per stagnum nostrum lumina vestra natant.

AD ECDICIUM SORORIUM SUUM

S20 v.1 Natalis noster Nonas instare Novembres
 2 admonet : occurras non rogo, sed jubeo.
 3 Sit tecum conjunx, duo nunc properate ; sed illud
 4 post annum optamus tertius ut venias.

DE PISCIBUS NOCTE CAPTIS

S21 v.1 Quattuor haec primum pisces nox insuit hamis ;
 2 inde duos tenui, tu quoque sume duos.
 3 Quos misi, sunt majores ; rectissimus ordo est ;
 4 namque animae nostrae portio major eras.

SIDONIVS PONTIO LEONTIO SVO SALVTEM
 [Oratio soluta]

S22 v.1

BVRGVS PONTII LEONTII

S22B v.1 Bistonii stabulum regis, Busiridis aras,
 2 Antiphatae mensas et Taurica regna Thoantis
 3 atque Ithaci ingenio fraudatum luce Cyclopa
 4 portantem frontis campo per concava montis
 5 par prope transfossi tenebrosum luminis antrum,
 6 hospes, adi, si quis Burgum taciturus adisti.
 7 Et licet in carmen non passim laxet habenas
 8 Phoebus et hic totis non pandat carbasa fandi,
 9 quisque tamen tantos non laudans ore penates
 10 inspicias, inspiceris : resonat sine voce voluntas ;
 11 nam tua te tacitum vivere silentia clamant.
 12 Ergo age, Pierias, Erato, mihi percute chordas ;
 13 responent Satyri, digitumque pedemque moventes
 14 ludant et tremulo non rumpant cantica saltu.
 15 Quidquid forte Dryas vel quidquid Hamadryas umquam
 16 conexis sibimet festum plausere Napaeis,
 17 dependant modo, Burge, tibi, vel Naidas istic,
 18 Nereidum chorus alme, doce, cum forte Garumna
 19 huc redeunte venis pontumque in flumine sulcas.
 20 Pande igitur causas, Erato, laribusque sit ede
 21 quis genius ; tantum non est sine praesule culmen.
 22 Forte sagittiferas Euan populatus Erythras

23 vite capistratas cogebat ad esseda tigres,
24 intrabat duplicem qua temo racemifer arcum.
25 Marcidus ipse sedet curru ; madet ardua cervix
26 sudati de rore meri, caput aurea rumpunt
27 cornua et indigenam jaculantur fulminis ignem
28 (sumpserat hoc nascens primum, cum transiit olim
29 in patrium de matre femur) ; fert tempus utrumque
30 veris opes rutilosque ligat vindemia flores ;
31 cantharus et thyrsus dextra laevaue feruntur,
32 nec tegit exertos, sed tangit palla lacertos ;
33 dulce natant oculi, quos si fors vertat in hostem,
34 attonitos, solum dum cernit, inebriat Indos.
35 Tum salebris saliens quotiens se concutit axis,
36 passim deciduo perfunditur orbita musto.
37 Bassaridas, Satyros, Panas Faunosque docebat
38 ludere Silenus jam numine plenus alumno,
39 sed comptus tamen ille caput ; nam vertice nudo
40 amissos sertis studet excusare capillos.
41 Corniger inde novi fit Ganges pompa triumphi ;
42 cernuus inpexam faciem stetit ore madenti et
43 arentes vitreis adjuvit fletibus undas ;
44 conjectas in vincla manus post terga revinxit
45 pampinus ; hic sensim captivo umore refusus
46 sponte refrondescit per bracchia roscida palmes.
47 Nec non et rapti conjunx ibi vincta mariti
48 it croceas demissa genas vetitaque recondi
49 lampade cum Solis radiis Aurora rubebat.
50 Adfuit hic etiam post perdita cinnama Phoenix,
51 formidans mortem sibi non superesse secundam.
52 Succedit captiva cohors, quae fercula gazis
53 fert onerata suis ; ebur hic hebenusque vel aurum
54 et niveae piceo raptae de pectore bacae
55 gestantur ; quicumque nihil sustentat, odoros
56 mittitur in nexus ; videas hic ipsa placere
57 supplicia et virides violis halare catenas.
58 Ultima nigrantes incedunt praeda elephantum ;
59 informis cui forma gregi : riget hispida dorso
60 vix ferrum passura cutis ; quippe improba cratem
61 nativam nec tela forant, contracta vicissim
62 tensaque terga feris crepitant usuque cavendi
63 pellunt excussis impactum missile rugis.
64 Jamque iter ad Thebas per magnum victor agebat
65 aera et ad summas erexerat orgia nubes,
66 cum videt Aonia venientem Delion arce.
67 Grypas et ipse tenet : vultus his laurea curvos
68 fronde lupata ligant ; hederis quoque circumplexis
69 pendula lora virent ; sensim fera subvolat ales
70 aeras terraeque vias, ne forte citato
71 alarum strepitu lignosae frangat habenas.
72 Aeternum nitet ipse genas ; crevere corymbis
73 tempora et auratum verit coma concolor axem ;
74 laeva parte tenet vasta dulcedine raucam
75 caelato Pythone lyram, pars dextra sagittas
76 continet atque alio resonantes murmure nervos.
77 Ibant Pipliades pariter mediumque noveno
78 circumstantes umbrabant syrmate currum.
79 Pendet per teretes tripodas Epidaurius anguis
80 diffusus sanctum per colla salubria virus.

81 Hic et crinisatas jungebat Pegasus alas,
82 portans doctiloquo facundum crure Crotonem.
83 Ut sese junxere chori, consurgit uterque
84 fratris in amplexus, sed paulo segnior Euan,
85 dum pudet instabiles, si surgat, prodere plantas.
86 Tum Phoebus " quo pergis ? " ait, " num forte nocentes,
87 Bacche, petis Thebas ? te cretus Echione nempe
88 abnegat esse deum. Linque his, rogo, moenia, linque,
89 et mecum mage flecte rotas. Despexit Agave
90 te colere et nosmet Niobe ; riget inde superba,
91 vulnera tot patiens quot spectat vulnera ventris,
92 optantemque mori gravius clementia fixit ;
93 parcere saepe malum est sensumque inferre dolori.
94 Ipsa autem nato occiso Pentheia mater
95 amplius ut furiat numquid non sana futura est ?
96 Ergone Aonios colles habitare valemus,
97 cum patris extincti thalamis potietur adulter,
98 frater natorum, conjunx genetricis habendus,
99 vitricus ipse suus ? Cordi est si jungere gressum,
100 dicam qua pariter sedem tellure locemus.
101 " Est locus, irrigua qua rupe, Garumna, rotate,
102 et tu qui simili festinus in aequora lapsu
103 exis curvata, Durani muscose, saburra,
104 jam pigrescentes sensim confunditis amnes.
105 Currit in adversum hic pontus multoque recurso
106 flumina quas volvunt et spernit et expetit undas.
107 At cum summotus lunaribus incrementis
108 ipse Garumna suos in dorsa recolligit aestus,
109 praecipiti fluctu raptim redit atque videtur
110 in fontem jam non refluxus sed defluus ire.
111 Tum recipit laticem quamvis minor ille minorem
112 stagnanti de fratre suum, turgescit et ipse
113 Oceano propriasque facit sibi litora ripas.
114 Hos inter fluvios, uni mage proximus undae, est
115 aethera mons rumpens alta spectabilis arce,
116 plus celsos habiturus eros vernamque senatum.
117 Quem generis princeps Paulinus Pontius olim,
118 cum Latius patriae dominabitur, ambiet altis
119 moenibus, et celsae transmittent aera turrets ;
120 quarum culminibus sedeant commune micantes
121 pompa vel auxilium ; non illos machina muros,
122 non aries, non alta strues vel proximus agger,
123 non quae stridentes torquet catapulta molares,
124 sed nec testudo nec vinea nec rota currens
125 jam positis scalis umquam quassare valebunt.
126 Cernere jam videor quae sint tibi, Burge, futura
127 (diceris sic) ; namque domus de flumine surgunt
128 splendentesque sedent per propugnacula thermae.
129 Hic cum vexatur piceis aquilonibus aestus,
130 scrupeus asprata latrare crepidine pumex
131 incipit ; at fractis saliens e cautibus altum
132 excutitur torrens ipsisque aspergine tectis
133 incluit ac tollit nautas et saepe jocosus
134 ludit naufragio ; nam tempestate peracta
135 destituit refruens missas in balnea classes.
136 Ipsa autem quantis, quibus aut sunt fulta columnis !
137 Cedat puniceo pretiosus livor in antro
138 Synnados, et Nomadum qui portat eburnea saxa

139 collis et herbosis quae vernant marmora venis ;
 140 candentem jam nolo Paron, jam nolo Caryston ;
 141 vilior est rubro quae pendet purpura saxo.
 142 " Et ne posteritas dubitet quis conditor extet,
 143 fixus in introitu lapis est ; hic nomina signat
 144 auctorum ; sed propter aqua, et vestigia pressa
 145 quae rapit et fuso detergit gurgite caenum.
 146 Sectilibus paries tabulis crustatus ad aurea
 147 tecta venit, fulvo nimis abscondenda metallo ;
 148 nam locuples fortuna domus non passa latere
 149 divitias prodit, cum sic sua culmina celat.
 150 Haec post assurgit duplicemque supervenit aedem
 151 porticus ipsa duplex, duplici non cognita plaustro ;
 152 quam rursus molli subductam vertice curvae
 153 obversis paulum respectant cornibus alae.
 154 Ipsa diem natum cernit sinuamine dextro,
 155 fronte videns medium, laevo visura cadentem.
 156 Non perdit quicquam trino de cardine caeli
 157 et totum solem lunata per atria servat.
 158 Sacra tridentiferi Jovis hic armenta profundo
 159 Pharnacis immergit genitor ; percussa securi
 160 corpora cornipedum certasque rubescere plagas
 161 sanguineo de rore putes ; stat vulneris horror
 162 verus, et occisis vivit pictura quadrigis.
 163 Ponticus hinc rector numerosis Cyzicon armis
 164 claudit ; at hinc sociis consul Lucullus opem fert,
 165 compulsusque famis discrimina summa subire
 166 invidet obsesso miles Mithridaticus hosti.
 167 Enatat hic pelagus Romani militis ardor
 168 et chartam madido transportat corpore siccam.
 169 " Desuper in longum porrectis horrea tectis
 170 crescunt atque amplis angustant fructibus aedes.
 171 Huc veniet calidis quantum metit Africa terris,
 172 quantum vel Calaber, quantum colit Apulus acer,
 173 quanta Leontino turgescit messis acervo,
 174 quantum Mygdonio committunt Gargara sulco,
 175 quantum, quae tacitis Cererem venerata choreis,
 176 Attica Triptolemo civi condebat Eleusin,
 177 cum populis hominum glandem linquentibus olim
 178 fulva fruge data jam saecula fulva perirent.
 179 Porticus ad gelidos patet hinc aestiva triones ;
 180 hinc calor innocuus thermis hiemalibus exit
 181 atque locum in tempus mollit ; quippe illa rigori
 182 pars est apta magis ; nam quod fugit ora Leonis,
 183 inde Lycaoniae rabiem male sustinet Ursae.
 184 Arcis at in thermas longe venit altior amnis
 185 et cadit in montem patulisque canalibus actus
 186 circumfert clausum cava per divortia flumen.
 187 Occiduum ad solem post horrea surgit opaca
 188 quae dominis hiberna domus : strepit hic bona flamma
 189 appositas depasta trabes ; sinuata camino
 190 ardentis perit unda globi fractoque flagello
 191 spargit lentatum per culmina tota vaporem.
 192 Continuata dehinc videas quae conditor ausus
 193 aemula Palladii textrina educere templis.
 194 Hac celsi quondam conjunx reverenda Leonti,
 195 qua non ulla magis nurus umquam Pontia gaudet
 196 illustris pro sorte viri, celebrabitur aede

197 vel Syrias vacuasse colus vel serica fila
 198 per cannas torsisse leves vel stamine fulvo
 199 praegnantis fusi mollitum nesse metallum.
 200 Parietibus posthinc rutilat quae machina junctis
 201 fert recutitorum primordia Judaeorum.
 202 Perpetuum pictura micat ; nec tempore longo
 203 depreiata suas turpant pigmenta figuras.
 204 " Flecteris ad laevam : te porticus accipit ampla
 205 directis curvata viis, ubi margine summo
 206 pendet et artatis stat saxea silva columnis.
 207 Alta volubilibus patet hic cenatio valvis ;
 208 fusilis euripus propter ; cadit unda superne
 209 ante fores pendente lacu, venamque secuti
 210 undosa inveniunt nantes cenacula pisces.
 211 Comminus erigitur vel prima vel extima turris ;
 212 mos erit hic dominis hibernum sigma locare.
 213 Hujus conspicuo residens in culmine saepe
 214 dilectum nostris Musis simul atque capellis
 215 aspiciam montem ; lauri spatiabor in istis
 216 frondibus, hic trepidam credam mihi credere Daphnen.
 217 Jam si forte gradus geminam convertis ad Arcton
 218 ut venias in templa dei qui maximus ille est,
 219 deliciis redolent junctis apotheca penusque ;
 220 hic multus tu, frater, eris. Jam divide sedem,
 221 cessurus mihi fonte meo, quem monte fluentem
 222 umbrat multicavus spatioso circite fornix.
 223 Non eget hic cultu, dedit huic natura decorem.
 224 Nil fictum placuisse placet, non pompa per artem
 225 ulla, resultanti non comet malleus ictu
 226 saxa, nec exesum supplebunt marmora tofum.
 227 Hic fons Castaliae nobis vice sufficit undae.
 228 Cetera dives habe ; colles tua jura tremiscant ;
 229 captivos hic solve tuos, et per juga Burgi
 230 laeta relaxatae fiant vineta catenae. "
 231 Confirmat vocem jamjam prope sobrius istam
 232 Silenus, pariterque chori cecinere faventes :
 233 " Nysa, vale Bromio, Phoebo, Parnase bivertex.
 234 Non istum Naxus, non istum Cirrha requirat,
 235 sed mage perpetuo Burgus placitura petatur ".

AD CONSENTIVM

S23 v.1 Cum jam pro meritis tuis pararem,
 2 Consenti, columen decusque morum,
 3 vestrae laudibus hospitalitatis
 4 cantum impendere pauperis cicutae,
 5 ultro in carmina tu tubam recludens
 6 converso ordine versibus citasti
 7 suetum ludere sic magis sodalem.
 8 Paret Musa tibi, sed impudentem
 9 multo cautius hinc stilum movebit ;
 10 nam cum carmina postules diserte,
 11 suades scribere, sed facis tacere.
 12 Nuper quadrupedante cum citato
 13 ires Phocida Sestiasque Baias,

14 illustres titulisque proeliisque
 15 urbes per duo consulum trophaea,
 16 (nam Martem tulit ista Julianum
 17 et Bruto duce nauticum furorem,
 18 ast haec Teutonicas cruenta pugnas,
 19 erectum et Marium cadente Cimbro),
 20 misisti mihi multiplex poema,
 21 doctum, nobile, forte, delicatum.
 22 Ibant hexametri superbientes
 23 et vestigia juncta, sed minora,
 24 per quinos elegi pedes ferebant ;
 25 misisti et triplicis metrum trochaei
 26 spondeo comitante dactyloque,
 27 dulces hendecasyllabos, tuumque
 28 blando faenore Sollium ligasti.
 29 Usuram petimurque reddimusque ;
 30 nam quod carmine pro tuo rependo,
 31 hoc centesima laudium tuarum est.
 32 Quid primum venerer colamque pro te ?
 33 Ni fallor, patriam patremque juxta ;
 34 qui quamquam sibi vindicare summum
 35 possit jure locum, tamen necesse est
 36 illam vincere quae parit parentes.
 37 Salve, Narbo potens salubritate,
 38 urbe et rure simul bonus videri,
 39 muris, civibus, ambitu, tabernis,
 40 portis, porticibus, foro, theatro,
 41 delubris, capitoliis, monetis,
 42 thermis, arcubus, horreis, macellis,
 43 pratis, fontibus, insulis, salinis,
 44 stagnis, flumine, merce, ponte, ponto ;
 45 unus qui venerere jure divos
 46 Lenaeum, Cererem, Palem, Minervam
 47 spicis, palmite, pascuis, trapetis.
 48 Solis fise viris nec expetito
 49 naturae auxilio procul relictis
 50 promens montibus altius cacumen,
 51 non te fossa patens nec hispidarum
 52 objectu sudium coronat agger ;
 53 non tu marmora bratteam vitrumque,
 54 non testudinis Indicae nitorem,
 55 non si quas eboris trabes refractis
 56 rostris Marmarici dedere barri
 57 figis moenibus aureasque portas
 58 exornas asaroticis lapillis ;
 59 sed per semirutas superbus arces,
 60 ostendens veteris decus duelli,
 61 quassatos geris ictibus molares,
 62 laudandis pretiosior ruinis.
 63 Sint urbes aliae situ minaces,
 64 quas vires humiles per alta condunt,
 65 et per praecipites locata cristas
 66 numquam moenia caesa gloriantur :
 67 tu pulsate places fidemque fortem
 68 oppugnatio passa publicavit.
 69 Hinc te Martius ille rector atque
 70 magno patre prior, decus Getarum,
 71 Romanae columen salusque gentis,

72 Theudoricus amat sibi que fidum
 73 adversos probat ante per tumultus.
 74 Sed non hinc videare forte turpis,
 75 quod te machina crebra perforavit ;
 76 namque in corpore fortium virorum
 77 laus est amplior amplior cicatrix.
 78 In castris Marathoniiis merentem
 79 vulnus non habuisse grande probrum est ;
 80 inter Publicolas manu feroces
 81 trunco Mutius eminet lacerto ;
 82 vallum Caesaris opprimante Magno
 83 inter tot facies ab hoste tutas
 84 luscus Scaeva fuit magis decorus.
 85 Laus est ardua dura sustinere ;
 86 ignavis, timidis et improbatis
 87 multum fingitur otiosa virtus.
 88 Quid quod Caesaribus ferax creandis,
 89 felix prole virum, simul dedisti
 90 natos cum genitore principantes ?
 91 Nam quis Persidis expeditionem
 92 aut victricia castra praeteribit
 93 Cari principis et perambulatum
 94 Romanis legionibus Niphaten,
 95 tum cum fulmine captus imperator
 96 vitam fulminibus parem peregit ?
 97 His tu civibus, urbe, rure pollens,
 98 Consenti mihi gignis, alme, patrem,
 99 illum cui nitidi sales rigorque
 100 Romanus fuit Attico in lepore.
 101 Hunc Milesius et Thales stupere
 102 auditum potuit simulque Lindi est
 103 notus qui Cleobulus inter arces,
 104 et tu qui, Periandre, de Corintho es,
 105 et tu quem dederat, Bias, Priene,
 106 et tu, Pittace, Lesbii sophistes,
 107 et tu qui tetricis potens Athenis
 108 vincis Socraticas, Solon, palaestras,
 109 et tu, Tyndareis satus Therapnis,
 110 Chilon, legifero prior Lycurgo.
 111 Non hic, si voluit vacante cura
 112 quis sit sideribus notare cursus,
 113 diversas Arato vias cucurrit ;
 114 non hunc, cum geometricas ad artes
 115 mentem composuit, sequi valebat
 116 Euclides spatium sciens Olympi ;
 117 non hunc, si voluit rotare rhythmos,
 118 quicquam proposito virum morari
 119 Chrysippus potuisset ex acervo.
 120 Hic cum Amphioniae studebat arti
 121 plectro, pollice, voce tibiaque,
 122 Thrax vates, deus Arcas atque Phoebus
 123 omni carmine post erant et ipsas
 124 Musas non ita musicas putares.
 125 Hic si symmate cultus et cothurno
 126 intrasset semel Atticum theatrum,
 127 cessissent Sophocles et Euripides ;
 128 aut si pulpita personare socco
 129 comoedus voluisset, huic levato

130 palmam tu digito dares, Menander.
131 Hic cum senipedem stilum polibat
132 Zmyrnaeae vice doctus officinae
133 aut cum se historiae dabat severae,
134 primos vix poterant locos tueri
135 torrens Herodotus, tonans Homerus.
136 Non isto potior fuisset, olim
137 qui Pandioniam movebat arte
138 orator caveam tumultuosus,
139 seu luscum raperetur in Philippum,
140 causam seu Ctesiphontis actitaret ,
141 vir semper popularitate crescens
142 et juste residens in arce fandi,
143 qui fabro genitore procreatus
144 oris maluit expolire limam.
145 Quid vos eloquii canam Latini,
146 Arpinas, Patavine, Mantuane,
147 et te, comica qui doces, Terenti,
148 et te, tempore qui satus severo
149 Graios, Plaute, sales lepore transis,
150 et te multimoda satis verendum
151 scriptorum numerositate, Varro,
152 et te, qui brevitatem, Crispe, polles,
153 et qui pro ingenio fluente nulli,
154 Corneli Tacite, es tacendus ori,
155 et te Massiliensium per hortos
156 sacri stipitis, Arbiter, colonum
157 Hellespontiaci parem Priapo,
158 et te carmina per libidinosa
159 notum, Naso tener, Tomosque missum,
160 quondam Caesareae nimis puellae
161 ficto nomine subditum Corinnae ?
162 Quid celsos Senecas loquar vel illum
163 quem dat Bilbilis alta Martialem,
164 terrarum indigenas Hibericarum ?
165 Quid quos duplicibus jugata taedis
166 Argentaria Polla dat poetas ?
167 Quid multos varii stili retexam ?
168 Arguti, teneri, graves, dicaces,
169 si Consentius adfuit, latebant.
170 Huic summi ingenii viro simulque
171 summae nobilitatis atque formae
172 juncta est femina quae domum ad mariti
173 prisci insignia transferens Jovini
174 implevit trabeis larem sophistae.
175 Sic intra proprios tibi penates,
176 Consenti, patriae decus superbum,
177 fastis vivit avus paterque libris.
178 Haec per stemmata te satis potentem,
179 morum culmine sed potentiorem,
180 non possim merita sonare laude,
181 nec si me Odrysio canens in antro,
182 qua late trepidantibus fluentis
183 cautes per Ciconum resultat Hebrus,
184 princeps instituisset ille vatium,
185 cum dulces animata saxa chordae
186 ferrent per Rhodopen trahente cantu
187 et versa vice fontibus ligatis

188 terras currere cogent anhelas,
189 nec non Hismara solibus paterent
190 aurita chelyn expetente silva
191 et nulli resolubiles calori
192 curvata ruerent nives ab Ossa,
193 stantem aut Strymona Bistones viderent,
194 cum carmen rapidus latex sitiret ;
195 nec si Peliaco datus bimembri
196 ad Centaurica plectra constitissem,
197 hinnitum duplicis timens magistri ;
198 nec si me docuisset ille fari,
199 jussus pascere qui gregem est clientis
200 Amphrysi ad fluvium deus bubulcus,
201 quod ferrugineos Cyclopas arcu
202 stravit sub Liparensibus caminis
203 vibrans plus grave fulmen in sagitta.
204 Jam primo tenero calentem ab ortu
205 excepere sinu novem sorores,
206 et te de genetrice vagientem
207 tinxerunt vitrei vado Hippocrenes :
208 tunc, hac mersus aqua, loquacis undae
209 pro fluctu mage litteras bibisti.
210 Hinc tu jam puer aptior magistro
211 quidquid rhetoricae institutionis,
212 quidquid grammaticalis aut palaestrae est,
213 sicut jam tener hauseras, vorasti.
214 Et jam te aula tulit plusque princeps
215 inter conspicuos statim locavit,
216 consistoria quos habent, tribunos ;
217 jamque et purpureus in arce regni
218 praeesse officiis tuis solebat,
219 mores nobilitate quod merebant :
220 tantum culminis et decus stupendum
221 scripti annalibus indicant honores.
222 Hinc tu militiam secutus amplam,
223 castrensem licet ampliare censum
224 per suffragia justa debuisses,
225 sollemnis tamen abstinens lucelli
226 fama plus locuples domum redisti
227 solum quod dederas tuum putando.
228 Tum si forte fuit quod imperator
229 Eoas soceri venire in aures
230 fido interprete vellet et perito,
231 te commercia duplicis loquelae
232 doctum solvere protinus legebat.
233 O, sodes, quotiens tibi loquenti
234 Byzantina sophos dedere regna,
235 et te seu Latialiter sonantem
236 tamquam Romulea satum Subura,
237 seu linguae Argolicae rotunditate
238 undantem Marathone ceu creatum
239 plaudentes stupuere Bosphorani,
240 mirati minus Atticos alumnos !
241 Hinc si foedera solverentur orbis,
242 pacem te medio darent feroces
243 Chunus, Sauromates, Getes, Gelonus ;
244 tu Tuncrum et Vachalim, Visurgin, Albin,
245 Francorum et penitissimas paludes

246 intrares venerantibus Sygambris
 247 solis moribus inter arma tutus,
 248 tu Maeotida Caspiaeque portas,
 249 tu fluxis equitata Bactra Parthis
 250 constans intrepidusque sic adires
 251 ut fastu posito tumentis aulae
 252 qui supra satrapas sedet tyrannus
 253 ructans semideum propinquitates
 254 lunatum tibi flecteret tiaram.
 255 Tu si publica fata non vetarent
 256 ut Byrsam peteres vel Africanæ
 257 telluris Tanaiticum rebellem,
 258 confestim posito furore Martis
 259 post piratica damna destinaret
 260 plenas mercibus institor carinas,
 261 et per te bene pace restituta
 262 non ultra mihi bella navigarent.
 263 Jam si seria forte terminantem
 264 te spectacula ceperant theatri,
 265 pallebat chorus omnis histrionum
 266 tamquam si Arcitenens novemque Musæ
 267 propter pulpita iudices sederent.
 268 Coram te Caramallus aut Phabaton
 269 clausis faucibus et loquente gestu,
 270 nutu, crure, genu, manu, rotatu
 271 toto in schemate vel semel latebit,
 272 sive Aetias et suus Iason
 273 inducuntur ibi ferosque Phasis,
 274 qui jactos super arva Colcha dentes
 275 expavit, fruticante cum duello
 276 spicis spicula mixta fluctuarent ;
 277 sive prandia quis refert Thyestæ
 278 seu vestros, Philomela torva, planctus,
 279 discerptum aut puerum cibumque factum
 280 jamjam conjugis innocentioris ;
 281 seu raptus Tyrios Jovemque taurum
 282 spreto fulmine fronte plus timendum ;
 283 seu turris Danaæ refertur illic,
 284 cum multum pluvio rigata censu est,
 285 dans plus aurea furta quam metalla ;
 286 seu Ledam quis agit Phrygemque ephebum
 287 aptans ad cyathos facit Tonanti
 288 suco nectaris esse dulciorem ;
 289 seu Martem simulat modo in catenas
 290 missum Lemniacas, modo aut repulso
 291 formam imponit apri caputque saetis
 292 et tergum asperat hispidisque malis
 293 leve incurvat ebur, vel ille fingit
 294 hirtam dorsa feram repanda tela
 295 attritu adsiduo cacuminantem ;
 296 seu Perseia virgo vindicata
 297 illic luditur harpe conjugali,
 298 seu quod carminis atque fabularum
 299 clausa ad Pergamam dat bilustre bellum.
 300 Quid dicam citharistrias, choraulas,
 301 mimos, schoenobatas, gelasianos
 302 cannas, plectra, jocos, palen, rudentem
 303 coram te trepidanter explicare ?

304 Nam circensibus ipse quanta ludis
305 victor gesseris intonante Roma
306 laetam par fuit exarare Musam.
307 Janus forte suas bifrons Kalendas
308 anni tempora circinante Phoebo
309 sumendas referebat ad curules.
310 Mos est Caesaris hic die bis uno
311 (privatos vocitant) parare ludos.
312 Tunc coetus juvenum, sed aulicorum,
313 Elei simulacra torva campi
314 exercet spatiantibus quadrigis.
315 Et jam te urna petit cietque raucae
316 acclamatio sibilans coronae ;
317 tum qua est janua consulumque sedes,
318 ambit quam paries utrimque senis
319 cryptis carceribusque fornicatus,
320 uno e quattuor axe sorte lecto
321 curvas ingrederis premens habenas.
322 Id collega tuus simulque vobis
323 pars adversa facit ; micant colores,
324 albus vel venetus, virens rubensque,
325 vestra insignia. Continent ministri
326 ora et lora manus jubasque tortas
327 cogunt flexilibus latere nodis
328 hortanturque obiter juvantque blandis
329 ultro plausibus et voluptuosum
330 dictant quadrupedantibus furorem.
331 Illi ad claustra fremunt repagulisque
332 incumbunt simul ac per obseratas
333 transfumant tabulas et ante cursum
334 campus flatibus occupatur absens.
335 Impellunt, trepidant, trahunt, repugnant,
336 ardescunt, saliunt, timent, timentur,
337 nec gressum cohibent, sed inquieto
338 duratum pede stipitem flagellant.
339 Tandem murmure bucinæ strepentis
340 suspensas tubicen vocans quadrigas
341 effundit celeres in arva currus.
342 Non sic fulminis impetus trisulci,
343 non pulsa Scythico sagitta nervo,
344 non sulcus rapide cadentis astri,
345 non fundis Balearibus rotata
346 umquam sic liquidos poli meatus
347 rupit plumbea glandium procella.
348 Cedit terra rotis et orbitarum
349 moto pulvere sordidatur aer ;
350 instant verberibus simul regentes,
351 jamque et pectora prona de covinno
352 extensi rapiuntur et jugales
353 trans armos feriunt vacante tergo,
354 nec cernas cito, cernuos magistros
355 temones mage sufferant an axes.
356 Jam vos ex oculis velut volantes
357 consumpto spatio patientiore
358 campus clauserat artus arte factus,
359 per quem longam, humilem duplamque muro
360 euripus sibi machinam tetendit.
361 Ut meta ulterior remisit omnes,

362 fit collega tuus prior duobus,
363 qui te transierant ; ita ipse quartus
364 gyri condicione tum fuisti.
365 Curae est id mediis, ut ille primus,
366 pressus dexteriore concitatu
367 partem si patefecerit sinistram
368 totas ad podium ferens habenas,
369 curru praetereatur intus acto.
370 Tu conamine duplicatus ipso
371 stringis quadrijugos et arte summa
372 in gyrum bene septimum reservas ;
373 instabant alii manu atque voce,
374 passim et deciduis in arva guttis
375 rectorum alipedumque sudor ibat.
376 Raucus corda ferit fragor faventum
377 atque ipsis pariter viris equisque
378 fit cursu calor et timore frigus.
379 Itur sic semel, itur et secundo,
380 est sic tertius atque quartus orbis ;
381 quinto circite non valens sequentum
382 pondus ferre prior retorquet axem,
383 quod velocibus imperans quadrigis
384 exhaustos sibi senserat jugales ;
385 jam sexto reditu perexplicato
386 jamque et praemia flagitante vulgo
387 pars contraria nil timens tuam vim
388 securas prior orbitas terebat,
389 tensis cum subito simul lupatis,
390 tensis pectoribus, pede ante fixo,
391 quantum auriga suos solebat ille
392 raptans Oenomaum tremente Pisa,
393 tantum tu rapidos teris jugales.
394 Hic compendia flexuosa metae
395 unus dum premit, incitatus a te
396 elatas semel impetu quadrigas
397 juncto non valuit plicare gyro ;
398 quem tu, quod sine lege praeter iret,
399 transisti remanens, ab arte restans.
400 Alter dum popularitate gaudet,
401 dexter sub cuneis nimis cucurrit.
402 Hunc, dum obliquat iter diuque lentus
403 sero cornipedes citat flagello,
404 tortum tramite transis ipse recto.
405 Hic te incautius assecutus hostis
406 sperans anticipasse jam priorem
407 transversum venit impudens in axem ;
408 incurvantur equi, proterva crurum
409 intrat turba rotas quaterque terni
410 artantur radii, repleta donec
411 intervalla crepent volubilibusque
412 frangat margo pedes ; ibi ipse quintus
413 curru praecipitatus obruente
414 montem multiplici facit ruina,
415 turpans prociduam cruore frontem.
416 Miscet cuncta fragor resuscitatus,
417 quantum non cyparissifer Lycaeus,
418 quantum non nemorosa tollit Ossa
419 crebras inrequieta per procellas,

420 quantum nec reboant volutae ab Austro
 421 Doris Trinacris aut voraginoso
 422 quae vallat sale Bosphorum Propontis.
 423 Hic mox praecipit aequus imperator
 424 palmis serica, torquibus coronas
 425 conjungi et meritum remunerari,
 426 victis ire jubens satis pudendis
 427 villis versicoloribus tapetas.
 428 Jam vero juvenalibus peractis
 429 quem te praebueris sequente in aevo,
 430 intra aulam soceri mei expetitus
 431 curam cum moderatus es Palati,
 432 chartis posterioribus loquemur,
 433 si plus temporibus vacat futuris ;
 434 nunc quam diximus hospitalitatem
 435 paucis personet obsequens Thalia.
 436 O dulcis domus, o pii penates,
 437 quos (res difficilis sibique discors)
 438 libertas simul excolit pudorque !
 439 O convivium, fabulae, libelli,
 440 risus, serietas, dicacitates,
 441 occursus, comitatus unus idem,
 442 seu delubra dei colenda nobis
 443 tecta illustria seu videnda Livi,
 444 sive ad pontificem gradus ferendi,
 445 sive ad culmina Marcii Myronis,
 446 sive ad doctiloqui Leonis aedes
 447 (quo bis sex tabulas docente juris
 448 ultro Claudius Appius lateret
 449 claro obscurior in decemviratu ;
 450 at si dicat epos metrumque rhythmis
 451 flectat commaticis tonante plectro,
 452 mordacem faciat silere Flaccum,
 453 quamvis post satiras lyramque tendat
 454 ille ad Pindaricum volare cygnum) ;
 455 seu nos, Magne, tuus favor tenebat,
 456 multis praedite dotibus virorum,
 457 forma, nobilitate, mente, censu
 458 (cujus si varios eam per actus,
 459 centum et ferrea lasset ora laude,
 460 constans, ingeniosus efficaxque,
 461 prudens arbiter, optimus propinquus,
 462 nil fraudans genii sibi vel ulli
 463 personas, loca, tempus intuendo) ;
 464 seu nos atria vestra continebant,
 465 Marcelline meus, perite legum
 466 (qui, verax nimis et nimis severus,
 467 asper crederis esse nescienti ;
 468 at si te bene quispiam probavit,
 469 noscit quod velit ipse judicare ;
 470 nam numquam metuis loqui quod aequum est,
 471 si te Sylla premat ferusque Carbo,
 472 si tristes Marii trucesque Cinnae,
 473 et si forte tuum caput latusque
 474 circumstent gladii triumvirales) ;
 475 seu nos Limpidii lares habebant,
 476 civis magnifici virique summi,
 477 fraternam bene regulam sequentis ;

478 seu nos eximii simul tenebat
 479 nectens officiositas Marini,
 480 cujus sedulitas sodalitasque
 481 aeterna mihi laude sunt colendae ;
 482 seu quoscumque alios videre fratres
 483 cordi utrique fuit, quibus vacasse
 484 laudandam reor occupationem ;
 485 horum nomina cum referre versu
 486 adfectus cupiat, metrum recusat.
 487 Hinc nos ad propriam domum vocabas,
 488 cum mane exierat novum et calescens
 489 horam sol dabat alteram secundam.
 490 Hic promens teretes pilas trochosque,
 491 hic talos crepitantibus fritillis
 492 nos ad verbera jactuum struentes,
 493 tamquam Naupliades, repertor artis,
 494 gaudebas hilarem ciere rixam.
 495 Hinc ad balnea, non Neroniana
 496 nec quae Agrippa dedit vel ille cujus
 497 bustum Dalmaticae vident Salonae,
 498 ad thermas tamen ire sed libebat
 499 privato bene praebitas pudori.
 500 Post quas nos tua pocula et tuarum
 501 Musarum medius torus tenebat,
 502 quales nec statuas imaginesque
 503 aere aut marmoribus coloribusque
 504 Mentor, Praxiteles, Scopas dederunt,
 505 quantas nec Polycletus ipse finxit
 506 nec fit Phidiaco figura caelo.
 507 Sed jam te veniam loquacitati
 508 quingenti hendecasyllabi precantur.
 509 Tantum, etsi placeat, poema longum est.
 510 Jamjam sufficit, ipse et impediris
 511 multum in carmine perlegens amicum,
 512 dormitantibus otiosiore.

PROPEMPTICON AD LIBELLVM

S24 v.1 Egressus foribus meis, libelle,
 2 hanc servare viam precor, memento,
 3 quae nostros bene ducit ad sodales,
 4 quorum nomina sedulus notavi ;
 5 antiquus tibi nec teratur agger,
 6 cujus per spatium satis vetustis
 7 nomen Caesareum viret columnis ;
 8 sed sensim gradere, ut moras habendo
 9 affectum celerem noves amicis.
 10 Ac primum Domiti larem severi
 11 intrabis trepidantibus Camenis :
 12 tam censorius haud fuit vel ille
 13 quem risisse semel ferunt in aevo ;
 14 sed gaudere potes rigore docto :
 15 hic si te probat, omnibus placebis.
 16 Hinc te suscipiet benigna Brivas,
 17 sancti quae fovet ossa Juliani,

18 quae dum mortua mortuis putantur,
 19 vivens e tumulo micat potestas.
 20 Hinc jam dexteriora carpis arva
 21 emensusque jugum die sub uno
 22 flavum crastinus aspicias Triobrem ;
 23 tum terram Gabalum satis nivosam
 24 et, quantum indigenae volunt putari,
 25 sublimem in puteo videbis urbem.
 26 Hinc te temporis ad mei Laonas
 27 Justinum rapies suumque fratrem,
 28 quorum notus amor per orbis ora
 29 calcat Pirithoumque Theseumque
 30 et fidum rabidi sodalem Orestae.
 31 Horum cum fueris sinu receptus,
 32 ibis Trevidon et calumniosis
 33 vicinum nimis, heu, jugum Rutenis.
 34 Hic docti invenies patrem Tonanti,
 35 rectorem columenque Galliarum,
 36 prisca Ferreolum parem Syagri,
 37 conjunx Papianilla quem pudico
 38 curas participans juvat labore,
 39 qualis nec Tanaquil fuit nec illa
 40 quam tu, Tricipitine, procreasti,
 41 qualis nec Phrygiae dicata Vestae
 42 quae contra satis Albulam tumentem
 43 duxit virgineo ratem capillo.
 44 Hinc te Laesora, Caucason Scytharum
 45 vincens, aspiciet citusque Tarnis,
 46 limosum et solido sapore pressum
 47 piscem perspicua gerens in unda.
 48 Hic Zeti et Calais tibi adde pennas
 49 nimbosumque jugum fugax caveto ;
 50 namque est assiduae ferax procellae ;
 51 sed quamvis rapido ferare cursu,
 52 lassum te Vorocingus obtinebit.
 53 Nostrum hic invenies Apollinarem,
 54 seu contra rabidi Leonis aestus
 55 vestit frigore marmorum penates,
 56 sive hortis spatiat in repostis,
 57 quales mellifera virent in Hybla,
 58 quales Corycium senem beantes
 59 fuscabat picei latex Galaesi ;
 60 sive inter violas, thymum, ligustrum,
 61 serpyllum, casiam, crocum atque caltam,
 62 narcissos hyacinthinosque flores
 63 spernit quam pretii petitor ampli
 64 glaebam turifer advehit Sabaeus ;
 65 seu ficto potius specu quiescit
 66 collis margine, qua nemus reflexum
 67 nativam dare porticum laborans
 68 non lucum arboribus facit, sed antrum.
 69 Quis pomaria prisca regis Indi
 70 hic nunc comparet aureasque vites
 71 electro viridante pampinatas,
 72 cum Porus posuit crepante gaza
 73 fulvo ex palmite vineam metalli
 74 gemmarum fluitantibus racemis ?
 75 Hinc tu Cottion ibis atque Avito

76 nostro dicis " ave ", dehinc " valetto ".
77 Debes obsequium viro perenne ;
78 nam, dent hinc veniam mei propinqui,
79 non nobis prior est parens amico.
80 Hinc te jam Fidulus, decus bonorum
81 et nec Tetradio satis secundus
82 morum dotibus aut tenore recti,
83 sancta suscipit hospitalitate.
84 Exin tende gradum Tribusque Villis
85 Thaumastum expete, quemlibet duorum :
86 quorum junior est mihi sodalis
87 et collega simul graduque frater ;
88 quod si fors senior tibi invenitur,
89 hunc pronus prope patrum saluta.
90 Hinc ad consulis ampla tecta Magni
91 Felicemque tuum veni, libelle ;
92 et te bybliothecca qua paterna est,
93 qualis nec tetrici fuit Philagri,
94 admitti faciet Probus probatum ;
95 hic saepe Eulaliae meae legeris,
96 cujus Cecropiae pares Minervae
97 mores et rigidi senes et ipse
98 quondam purpureus socer timebant.
99 Sed jam sufficit : ecce linque portum ;
100 ne te pondere plus premam saburrae,
101 his in versibus ancoram levato.